



L. XVI. Qui







OBSERVATIONES,
QUIBUS PRÆSTANTIORES VIRES
CORTICIS PERUVIANI RUBRI,
IN CURA INTERMITTENTIUM ALIARUMQUE
FEBRIUM STABILIENTUR.

Accedunt hinc indè annotationes in curam aliorum
morborum eodem Remedio.

Authore GUILIELMO SAUNDERS *M. D.*
Coll. Reg. Med. Londin. Socio, Nosocomii
Guyani Medico,

EDITIO ALTERA

Ex Anglico idiomate in Latinum versa
a P. C. DE BRABANT Med. Gand.

Æquè pauperibus prodest, locupletibus æquè.

HORAT.



G A N D A V I

Typis JUDOCI BEGYN, Typographi Civitatis, in
plateâ *Breydelsstege*, sub Signo Angeli.

M. DCC. LXXXIII.





INTERPRETIS PRÆFATIO.

☉) * ☼ ☽ On alio intuitu hoc opusculum
 ☼ N ☼ ex anglico in latinum sermo-
 ☽) * ☼ ☽ nem verti , quam ut Cortex
Ruber , qui SYDENHAMI & MORTONI tem-
 pore in usu , dein rejectus & sensim obli-
 vioni traditus fuisse videtur ; nunc vero
 ab anno 1779. casu fortuito reductus est,
 denuò innotesceret , & prima data oppor-
 tunitate a Mercatoribus nostris & Phar-
 macopolis in has regiones curaretur ad-
 ferri. •

Si enim verum sit , Corticem Peruvia-
 num inter heroica Remedia adeo primum
 esse , ut mirari oporteat , Majores nostros

ante eundem detectum & allatum, præfertim in epidemicis malignarum intermittentium constitutionibus, Medicinam agere potuisse, procul dubio nova eaque efficacior hujus Medicamenti species, quæ etiam in longè minori quantitate certiùs & promptiùs medetur, tam pro Medicorum voluptate, quam Ægrorum salute incomparabilis pretii res æstimanda est.


Corticem *Rubrum*, præ specie *Tenui* & *Convoluta*, quæ hætenus sola nobis cognita fuit, dictas vires possidere & hæc encomia mereri, unusquisque illico augurabitur, qui vel leviter in hac materia versatus dotes ejus sensibiles perspexerit: non solum etenim compactior, ponderosior, sub dentibus fragilior, in ore multum solubilior, & hinc manifestè resinosior apparet; sed etiam activa ejus principia perfectiùs elaborata, magis evecta; hinc præstantiora videntur. Ejus amarities, quamvis intensior sit, minùs tamen

ingrata est, & acerbitem illam, quæ in optimo Cortice *Ordinario* notatur, non habet adjunctam: ita ut duabus his Corticum speciebus inter se collatis, & re bene perpensa, illas quidem ex eadem Arbore desumi; sed Corticem *Ordinarium* immaturum, adhuc crudum, & ad imperfectiores Arboris partes pertinere oporteat concludere.

Optimè LISTERUS, cujus ævo a Cortice *Lato & Rubro* ad *Tenuem & Convolutum* deventum est, hanc rem perspexit; ut mirari oporteat, non obstante autoritate tanti viri, Corticem *Tenuem & Convolutum* prævaluisse: dicit enim: "porrò, si sit
 „ potior aliquis delectus in Cortice, ipsi
 „ nos Medici videmur culpandi, qui pessimum volumus ex inadvertentia. Nam
 „ is Cortex, me iudice, optimus est, qui
 „ e trunco Arboris; mox qui e ramis majoribus; deinde qui e ramusculis habetur: at ex ipsis summis & tenuioribus

„ furculis non nisi CRUDUS & ACERBUS
 „ Cortex detrahitur. Atque hoc satis
 „ constat ex analogia Corticis nostrarum
 „ Arborum, (quercûs puta) qui matu-
 „ rior , magis concoctus , majorumque
 „ longè virium , quo crassior vetustiorque ,
 „ vel ipsis Coriariis notissima res. „ (*)
 Hinc apparet , hunc Authorem Corticem
 Peruvianum *Latiorem* , seu *Rubrum* , quem
 ante viginti annos se in usu vidisse paulò
 inferiùs asserit , e trunco vel majoribus
 ramis desumptum , & efficaciorẽ ; *Te-*
nuem verò & *Convolutum* , quem solum
 hucusque novimus , ex ejusdem Arboris
 ramusculis , & deterioreẽ credidisse .

Ex eodem loco mihi manifestum vide-
 tur , potiùs Medicorum inadvertentia (ut
 LISTERUS ait) & præjudicata opinione ,
 quam necessitate ob Corticis *Latoris* &
Rubri defectum , aut politicâ œconomiâ ,



(*) De Hydrophobia pag. 71. Edit. Amstelod.

ut celeberrimus FOTHERGILL hujus opusculi pag. 115. insinuat , ad *Tenuem & Convolutum* Corticem deventum esse.

Præstantioribus his Corticis rubri dotibus sensibilibus ejusdem vires medicas revera proportionatas esse , in decursu hujus opusculi multis præclarorum Virorum testimoniis lector stabilitum inveniet. Has auctoritates utut maximi aestimarem , ipse tamen , simul ac hoc Medicamentum obtinere potui , quid posset , experiri volui. Opportunè inter plures intermittentium casus hunc pertinacissimum ad manum habebam.

J. DE VOS octodecim circiter annorum Juvenis , Cæmentarius , mense Septembri anni præteriti *Ostendæ* opificium suum exercens quartana corripitur , quæ eâdem typo & ferocia pertinacissimè eum torquere pergit usque ad hujus anni ineuntem Aprilem. --- Tum a præclaro hujus Urbis Mercatore , in cujus cella vinaria non

obstante morbo strenuè laborabat, mihi commendatur. --- Faciem mihi exhibebat Æger ictericam, inflatam; ut in Hydro-pem pronum pronuntiaffes. --- Febrim quantocyus fugandam esse ratus, duas uncias Corticis ordinarii inter duos paroxifmos affumendas præscripsi. --- Hoc Medicamentum ab honeſto Pharmacopœo optimum habuit, & ſtato tempore abſumpſit. --- Hinc febris non ſolùm non ſublata, ſed etiam paroxifmi ſolitâ ferociâ & omnino immutati redierunt. --- Corticem rubrum tum continuo expectans hunc Ægrum primo tentamini deſtino: tempeſtatem itaque accuſo, diætam præſcribo, & bono animo eſſe jubeo. --- Initio Maji voti compos factus Ægrum illico arceſſo. --- Febris typus eadem; paroxifmorum violentia potiùs aucta; Ægri habitus deterior erat. --- Dedi ei unciam & dimidiam Corticis rubri, partitis doſibus apyrexiaẽ tempore ſumendam. --- Hoc Remedio paroxifmus promptiſſimè & integrè ſublatus

est. --- Æger ad præcavendam recidivam adhuc uncias duas Corticis ordinarii assumpsit. --- Hactenus, post elapsas sex hebdomadas, omnino immunis mansit & optima fruitur valetudine.

In allato casu febris tam promptè & perfectè fugata fuerat, ut me pœniteret tantam Corticis rubri quantitatem adhibuisse. Rustico itaque ex adjacenti Vico, circiter quadragenario, quartana a quatuor mensibus laboranti, quæ pluries Cortice *ordinario* incassum fugata fuerat, aliquot diebus postea ejusdem Medicamenti tantum dimidiam unciam, eodem modo ut in superiori casu, sumendam dedi. --- Octiduo post paroxysmum primo ictu omnino sublatum fuisse retulit. --- Ad præcavendam recidivam præscripsi quotidie duas dragmas Corticis *ordinarii*, promisitque se post quatuordecim dies denuò ad me rediturum. --- Vir quadratus & ingratus hactenus promissis non stetit.

Ex his & quibusdam aliis casibus, quos hic non addo, quia, cum intermittentes vernaes essent, & Cortex *ordinarius* praviè non fuisset tentatus, minùs concludunt, mihi omnino affirmabatur, quod in pluribus hujus opusculi locis de hoc Cortice asseritur; dimidium scilicet illius quantitatis, ad quam Cortex *convolutus* passim præscribitur, satisfaciendo omni scopo sufficere. Sola hæc prærogativa, quamvis nulla alia dote Cortici *vulgari* præstaret, considerata difficultate, quæ nobis non rarò occurrit, averfantibus Ægris nauseosum hoc Medicamentum in sufficienti quantitate exhibendi, eundem maximè commendabilem & summi momenti rem redderet.

Non aliud Corticis rubri Præparatum, quam Extractum, tentavi. Id præterquam quod dotes externas præstantiores, quam Extractum Corticis *ordinarii*, possideat, efficacioribus etiam viribus medicis

pollere fufpicor. En unicum experimen-
tum.

N. BOOTE, novemdecim annorum Ju-
venis, Lapidida, circa finem menfis Maji
a Patre fuo pro implorando auxilio ad me
ducebatur. A tribus menfibus intermit-
tente laborabat, quæ omnes typos per-
currerat; jam tertiana erat. --- Ægri facies
iôterica, crura & abdomen tumidiffima,
refpiratio adeo anhelofa erat, ut vix in-
cedere poffet. --- Singulo paroxifmo hæc
fymptomata augebantur. --- Dragmas fex
Extracti Corticis rubri ei dono dedi, ut
apyrexix tempore abfumeret. --- Redit
poff quatrimum. --- Febris primo iôtu
fugata fuerat. --- Omnia fymptomata adeo
emendata erant, ut Juvenem vix agnofce-
rem. --- Sumpfit adhuc unciam unam Cor-
ticis *ordinarii*. --- Optimè fe habuit. --- Poff
quatuordecim dies levem tamen recidivam,
nullo pravo fymptomate fupatam, paf-
fus eft. --- Extractum Corticis *ordinarii*,

xij INTERPRETIS PRÆFATIO.


etiam in longè majori quantitate datum ,
numquam mihi se tam efficax præbuit.

His omnibus sine partium studio per-
spectis , non inutilem laborem credidi ,
hujus opusculi interpretatione, hoc Medi-
camentum in his Regionibus notius red-
dere : quod si quibusdam cujusvis novi
osoribus, aut quovis alio intuitu obcæ-
catis, ut in Anglia evenit, minùs arriserit,
sciant, me proximi commodum , bono-
norum existimationem, neminis applausum
confectari.





AUTHORIS INTRODUCTIO.

 Nsignis favor, quo prior eaque
numerosa Editio Dissertationis
meæ de Cortice Peruviano Ru-
bro excepta, & paucis hebdomadibus di-
vendita fuit, hanc alteram moliri mihi fa-
cilè persuasit. Adfert hæc plura adhuc
testimonia, quibus deductæ in priori doc-
trinae & opiniones firmentur. Adeo lu-
culentur jam probata est Corticis rubri in
fugandis febribus intermittentibus infalli-
bilis, ut res maximi momenti pro Ge-
neris Humani Commodo evaserit.

Animadvertet Lector, me repetitis &
accuratis Observationibus ductum plura
in hac editione, præsertim quæ ad febres
intermittentes complicatas & Rheumatif-
mum acutum spectant, addidisse.

. Non sine oblectamento Lectores certiores reddo, nunc amplam copiam rubri Corticis posse obtineri, neque majus pretium, ut spero, illos ab ejus usu absterrebit: vi-
liori enim constare invenietur, si consideratur dimidium illius quantitatis, ad quam Cortex ordinarius adhiberi debet, sufficere.

Timor subest, ne Mercatorum aviditate, præsertim dum sub forma pulveris divenditur, adulteretur. Ita meritis & famæ ejus detrahi posset. Non sine labore itaque varia ejusdem specimina collegi, eaque pro vario virtutis gradu ordine digesti. Ita præsertim junioribus Medicis, prælectionum mearum auditoribus, prodesse studui; cumque Cortex ruber Pharmacopolis ruri degentibus hætenus ferè ignotus sit, frequens illorum pro hac re ad me recursus hanc methodum necessariam reddidit.

Efficacia hujus Remedii tam firmò stat talo,
 ut nullius momenti res videri debeat, si
 Botanici existimarint, necdum satis lique-
 re, an ad LINNÆI *Cinchonam Officinalem*,
 an ad aliam Arborem pertineat. CL. HOPE,
 in Universitate Edinburgensi Botanicæ
 Professor & mihi Amicus, in suis ad me
 litteris notat: " in eo rei cardo vertitur,
 „ an Cortex ruber, qui *Ordinario* multò
 „ efficacior videtur, obtineri possit. Utrum
 „ vero ad *Cinchonam Officinalem* LINNÆI
 „ pertineat, nec ne, secundaria tantùm
 „ & minoris momenti quæstio est. Ves-
 „ tram tamen sententiam probabiliorem
 „ existimo. Dissertatio vestra omnes circa
 „ hanc rem attentiores efficiet, & hujus
 „ Remedii usum extendet.,,

Sequentibus pagellis modo prælo com-
 missis, contigit mihi copiam optimi Cor-

xvj AUTHORIS INTRODUCTION.

ticis rubri a Mercatore Hispano allatam videre. Constabat pro magna parte frustis tam parvis, quam Cortex ordinarius. Sub hac forma tamen rubedinein, sed magis ad Cinamomi colorem accedentem, servabat. Evidenter magis compactus & ponderosior erat, quam Cortex ordinarius. Admodum resinofus videbatur. Stratum exterius tenue, albicans & rugosum erat. Admodum fragilem se præbebat, & manifesta argumenta exhibebat, se Corticem tenuem & convolutum esse ejusdem Arboris, e qua Cortices latiores, rubri, qui in eadem cista continebantur, desumpti erant. Id tamen sententiam meam non minùs probabilem reddit. Fortè tantùm *Cinchonæ Officinalis*, ab Arborum ætate, solo, vel situ pendens, varietas est.





CORTICIS PERUVIANI RUBRI HISTORIA.

JAm dudum suspicabar Peruvianum Corticem, qualis apud nos passim in usu est, Corticis speciei ab Authoribus, qui in principio de hoc Remedio tractarunt, laudatæ & adhibitæ efficaciam cedere. MORTONUS & SYDENHAMUS, uterque Anglus, in quorum Operibus vires medicæ hujus Medicamenti in febribus intermittentibus aliisque ferè tamquam infallibiles extolluntur, id mihi præcipuè probabile reddebant. Illorum Virorum ævo Cortex Peruvianus tenuis, in tubulos convolutus, qualis apud nos præferri consuevit, non memoratur. Materiæ medicæ scriptores illis coætanei notant Corticem constare frustis latioribus, ma-

gis compactis, & coloris ferruginei. (a) Cortici rubro hæc dotes conveniunt, cujus interna superficies Ochram colore æmulatur, & medium seu resinofum stratum Lapidem Hæmatitem.

Mirabatur celeb. DE LA CONDAMINE, dum ei a D. BLACHYNDEN Societatis, quæ pro agenda in Mari Meridionali Mercatura in Anglia erecta est, tunc temporis Panamæ Rectore narrabatur, Artis Pharmaceuticæ & Materiæ Medicæ Scriptores Anglos semper Cortices tenues, convolutos prætulisse; dum interim Novæ Hispaniæ incolæ pluris facerent latiores. (b) Illarum opinionum diversitatem non


(a) Cortex crassitie mediocri, foras scaber, paululum canescens aliquando Musco obductus, intus lævis, coloris ferruginei, saporis acris & intensè amari. Autumno colligitur & Cortex circumcirca delibratur, tam trunci quam ramorum.

Dalei Pharmacologia, pag. 201. anno 1692.

(b) Ab aliquibus quatuor species Corticis Peruviani recensentur; passim tres: alba, flava & rubra. Loxæ mihi relatum est tres has species sola efficacia differre, albam vix vires aliquas possidere, & rubram flavâ multò præstantiorem esse.

Arbores, e quibus in principio Cortices, qui tum valde largi erant, desumpti sunt, omnes perierunt: decorticatione enim in adultis Arboribus peracta eas certissimè enecat. Experientia comprobatum est, dum idem in junioribus instituitur, aliquas deperire, sed majorem partem emergere. Ad hanc operationem ordinario cultro utuntur,

ex alia circumstantia possum deducere, nisi quod latiora Corticis frustra cum tenuioribus



quod utraque manu operarius tenet, & altiori, quo potest, loco in Corticem adigit: sic perscindendo descendit. Non videntur juniores Arbores adultis vicinæ, cum in eodem solo crescant, & eundem situm habeant, minorem iis efficaciam possidere. Differentia, si qua est, fortè a diversa Arborum ætate pendet. Paucae jam aliæ quam juniores videntur. Non memini me brachio crassiores & duodecim aut quindecim pedibus altiores vidisse. In juniore ætate abscissæ novos ramos e trunco emittunt.

Loxæ mihi etiam narrabatur olim crassiores Cortices magni æstimatos, & etiam tamquam quid rari habitos fuisse. Jam tamen tenues præferuntur, qui, cum minorem locum occupent & arctius se pro exportatione compingi sinunt, fortè Mercatoribus majus lucrum præbent. Panamæ tamen Societatis Anglicæ, quæ in Mari Meridionali Mercaturam agit, rector, cui omnis Peruvianus Cortex in Europam transvehendus commissus est, mihi asseverabat, analysim chemicam & experimenta in Anglia instituta tenui cortici fuisse, & eundem ideo præferri. Probabile videtur Cortices crassos ideo minoris habitos & rejectos esse, quia humiditatem facillimè contrahunt, & difficillimè ritè exsiccantur. Vulgi præjudicium jubet, ne Cortex aliquid efficacæ suæ diperdat, ut Arbor decrescente luna & in ea parte, qua orientem respicit, decorticetur. Hæ circumstantiæ, ut etiam Cortices in Monte *Cajanumæ* collectos fuisse, affirmabantur à notario publico anno 1735., dum *Marchio de Castelfuerte* copiam hujus Remedii Loxâ secum in Hispaniam transvehendam curabat.

Memoires de l'Academie de Scien. Ann. 1738.

in has regiones allata fibrosæ, spongiosæ, vel ligneæ passim sint texturæ; probabiliter humiditate vitiata, vel e marcidis & emortuis Arboribus desumpta.


Has rationes aliqui Pharmacopolæ, tamquam urgens argumentum, adversus rubri Corticis usum proposuerunt. Non desunt profectò, qui ejus introductioni sese opponunt; donec major copia allata & æquabiliùs inter eos divisa sit, vel donec magnam, quam possident, communis Corticis quantitatem divenerint.

Cum textura rubri Corticis magis compacta sit, & resinosum stratum arctè inter duo alia compressum & defensum, hinc ejus odor & sapor minus extricati & obvii sunt. Evidenter omni alia specie ponderosior est, &, cum nativas suas dotes meliùs servaverit, majori etiam cura præparatus & exsiccatus videtur.

Re attentè perpenſa probabile arbitror trunci & majorum ramorum Corticem esse. In hac opinione me confirmat judicium cl. Virorum mihi Amicorum WITHERING & FOTHERGILL, qui in suis ad me litteris notant in Cortice trunci & majorum ramorum Quercûs essen-

tiales & activas particulas efficaciores & in majori quantitate, quam in ramusculis & furculis, qui imperfectioris fabricæ sunt, existere. Fortè juniores Arbores necdum perfectam maturitatem nactæ, & quæ ideo debiliores & minùs efficaces Cortices præbent, tenuem & convolutum Peruvianum Corticem largiuntur. (c)

Ex analogia aliorum Corticum, ut etiam e foli & stiris efficacia ad mutandas non solum dotes externas, sed etiam vires medicas vegetabilium ejusdem speciei, videor mihi audacter posse concludere, differentiam, tam quoad magnitudinem, quam quoad colorem, inter rubrum Corticem & communem dependere vel a magnitudine ramorum, vel ab aliis cau-



(c) D. ARROT, Chirurgus in Scotia, qui in loco natali Corticem collegit, asserit Corticem tenuem tam magni habitum in Anglia ad juniores Arbores pertinere, hasque plerumque post Decorticationem vegetas manere, quod numquam accidit adultioribus. Id manifestò probat primum Corticem in Europam allatum frustra crassâ, largâ, & e majoribus Arboribus desumpta suppeditasse, hujusque penuria postea ad tenues juniorum Arborum Cortices deventum esse. D. ARROT & reliqui Peregrinatores, unanimi judicio, rubrum reliquo Cortici præferunt.

sis, quæ Inter Arbores non constituunt specificam diversitatem. Dum latiores quercûs Cortices cum ramusculorum ex eadem arbore de-
sumptorum Corticibus conféro, priores coloris rubri, posteriores pallidioris invenio. Scabrities latioris Corticis quercûs & omnes ejus dotes externæ habent se ad dotes tenuis Corticis ejusdem arboris, ut Cortex Peruvianus ruber ad communem. Non solum deinceps a Coriariis, quibuscum pro capiendo consilio de hac re sermonem habui, didici, quod latior Cortex quercûs vires magis adstringentes, quam tenuis, possideat; sed etiam utriusque infusionem inter se comparans, & strictissimis experimentis, quibus vis adstringens evinceretur, submittens, illis scilicet ferri solutionem affundendo, manifestò expertus sum, infusione latioris & magis compacti quercûs Corticis, majorem quantitatem præcipitati & coloris nigrioris, quam infusione tenuium ramusculorum Corticum, obtineri. Plures Medicos collecta a me Corticum quercûs specimina convicerunt, eosdem Cortices opinionem, quod Cortex ruber ad *Cinchonam Officinalem* LINNÆI pertineat, egregiè illustrare, & plurimum confirmare.

Sequens POMETI Corticis Peruviani descriptio ulterius hanc doctrinam stabilit „ Kinkina „ est Cortex Arboris in Regni Peruviani Provincia *Quitto*, & speciatim in montibus *Opido Loxæ* vicinis, crescentis. Arbor magnitudine Cerasum æmulatur. Ejus folia rotunda & dentata sunt. Florem dat oblongum, rubrum, qui abit in capsulam seu siliquam, nucleum compressum, album, tenui tunica obductum, amigdalæ similem includentem. Arbores in valle provenientes, quia plus nutrimenti ex hoc solo attrahere possunt, Corticem præbent crassiores, lævem, exterius coloris albidii vel flavicantis, interius pallido-fusci. Qui ex Arboribus in Montis summitate crescentibus desumitur præstantior est, exterius inæqualis, coloris magis fusci; interius obscurioris: mediis inter summitatem & vallem locus magis scabrum & fusciorem suppeditat. Omnium harum Arborum Cortices amari sunt; sed minùs reliquis e valle desumpti.

„ Ex dictis sequitur ima loca Corticem minoris efficaciae præbere, quia in his nutritus „ particulis terrestribus & aquis magis abun-

„ dat , quam ille , qui altiori loco provenit ,
 „ & qui ob contrariam causam præstantior est.
 „ Medium Montis omnium tamen optimum
 „ largitur , quia succus nutritius nec deficit in
 „ hoc solo , nec excedit. Alia Corticis Peru-
 „ viani species e Montibus *Potosi* adfertur :
 „ hæc fuscior , magis aromatica , intensius ama-
 „ ra , sed multò reliquis rarior est.


„ Dotes in Cortice desiderandæ sunt , ut
 „ sit PONDEROSUS ; SUBSTANTIAM habeat FIR-
 „ MAM , COMPACTAM & SICCAM. Cave a
 „ putrido ; ab humido , ab illo qui diffractus
 „ in pulverem fatiscit : cave ab illo , qui
 „ comminutis frustulis aliisve sordibus con-
 „ stat , ut quandoque in fundo cistæ inveni-
 „ tur. Præferatur constans frustris tenuibus ,
 „ quæ liviter inæqualia , coloris nigricantis ,
 „ musco canescente vel parvis filicis foliis
 „ hinc inde obfessa in externa facie sunt ;
 „ in interna coloris RUBICANTIS ; saporis amari
 „ & valde ingrati. Rejiciatur , qui dum fran-
 „ gitur totum filamentosum se exhibet , qui
 „ coloris subrusi est , ut etiam ille , qui
 „ exterius Cinamomum colore æmulatur ; licet
 „ ab illis , qui hoc Medicamentum non ap-

„ prime norunt , tanti habeatur , ut multò
 „ faciliùs quam , qui coloris nigricantis est ,
 „ vendatur. Cavendum quoque ab eo , cui
 „ frusta ligni adhærent.

„ Primùm circa annum 1650. a Cardinali de
 „ LUGO Jesuita e Regno Peruviano in Gal-
 „ liam allatus est, ubi tanti tum habebatur , ut
 „ pondus æquali auri pondere venderetur. (d)

Ab eo tempore , quo prior hujus opusculi editio in lucem prodiit in aliis regionibus etiam investigationes institui jussi , & ex illis planè convictus sum nullum superesse dubium, quin pertineat ad *Cinchonam Officinalem*. A D. BABBINGTON Nosocomii Guyani Pharmacopæo rubri Corticis specimen dono obtinui , quod ramulum Corticis tenuis ordinarii , ut allatus est , continet.

Corticis rubri specimina vidi , quæ frustis tam magnis constabant , ut nimia esset ligneæ partis proportio : hinc usui medico hic minùs



(d) Versio hæc latina ab anglica Authoris hinc inde differt : quoad essentialia tamen , illas nimirum dotes Corticis Peruviani a POMETO delineatas , quæ ad rubrum spectare videntur , non discrepant. *Interpres.*

aptus erat , quam qui frustis constat minoribus. Eò revera frequenti circa hanc rem experimentorum institutione veni , ut datis quibuscvis duobus Corticis frustis , Resinæ proportionem præcisè queam determinare.

Opposuerunt aliqui Corticem nostrum a *Mahogano* Cortice non diversum videri: verùm hoc examini subiecto & cum priori collato, consultis etiam Viris, quibus *Mahoganus* bene notus & familiaris erat , persuasissimum habeo nullum fundamentum existere, quo hæc opinio niteretur. Si naturæ scrutatores , data meliori occasione hanc subiecti nostri partem investigandi , postmodum probaverint ad Arborem genere vel specie a *Cinchona Officinali* diversam pertinere, hoc equidem inventum argumenta, quibus hujus Corticis præstantia stabilitur, non elidet; & profectò felicitati nostræ congratularer, si potius Angliæ Coloniae, quam solius Americæ Meridionalis productum foret.

Non pauci viri docti & perspicaces, qui in illam sententiam inclinabant, ut Corticem rubrum ad diversam Arborem referrent , illico eam mutabant, dum ejus Tincturam , Decoctum , vel Infusum , quæ ejus præparata genui-

num, sed magis saturatum & evectum, Corticis ordinarii saporem, ut etiam odorem, exhibent, explorabant. Suspicio nos diu a vero deviasse, dum ex externæ faciei colore de hujus Medicamenti viribus judicavimus. Corticis rubri specimina admodum resinosa vidi, cujus externa tunica valde alba; interiora verò strata compacta erant, & colorem obscure rubrum, aut ochreum exhibebant. Viginti cistas, ut allatæ erant, perscrutatus sum, & quantitatem non exiguam Corticis tenuis ordinarii rubro immixtam in omnibus agnovi.

Si hujus opusculi executio rei gravitati responderet, omnium certè attentionem magis, quam quodvis aliud artis medicæ argumentum, excitaret. Hoc illi non negabunt, qui malignitatis & lethalitatis intermittentium & remittentium febrium in omnibus regionibus, præsertim calidioribus, testes oculares fuerunt. Lethalitas illa minùs ignorantiae & imperitiæ illarum regionum Medicorum, quam ordinarii Corticis inefficiæ debetur.

Notum est in calidioribus regionibus multò plures febribus epidemicis, quæ plerumque a climate & anni tempestatibus pendent, oc-

cidi, quam hostium armis. In omnibus ferè febribus mali moris, quæ in India tam occidentali quam orientali nostros vexant & interimunt, Cortex præcipuum Remedium est. Rem itaque pro nobis magni momenti arbitror, ut classibus & exercitibus nostris de hoc Cortice rubro, qui numquam vel rarissimè medentes fallit, liberaliter provideatur.

Objecit pharmacopola hunc Corticem adeo efficacem & activum esse, ut Remedium non innocuum constituat. Respondi Vinum aquæ mixtum tutius esse in manu imperiti Medici, quam purum: ex eo tamen non posse inferri, Vinum non esse præstantius Cardiacum, quam aqua. Idem argumentum adhiberi posset ad probandum debiliora & effoeta Remedia, quia mitius operantur, inalteratis & perfectioribus ejusdem speciei præferenda esse. Credo ego generaliores & magis fundatas querelas esse adversus defectum efficacæ Corticis vulgaris; minimè vero Medicos conqueri, quod nimis se præbeat activum. In hujus asserti probationem lectorem relego ad adjunctas epistolas, quæ manifestò probant, hac hujus anni constitutione febres intermittentes fuisse adeo re-

fractarias & pertinaces , ut ordinario Cortici resistentes solo rubro superari potuerint.

Quamvis allato hoc Cortice illico bene de eodem augurarer, multum tamen aberat, ut eam præstantiam ei adscriberem, quam tot collectis undique clarorum Virorum, in remotis ab hac Metropoli locis praxim exercentium, testimoniis jam probatam censeo. Plures literæ majori ejus efficaciam adeo suffragantur, ut appareat eas convicto multis accuratis observationibus animo fuisse dictatas.

Pluribus possessionum nostrarum Medicis, mihi amicis, rubrum Corticem tentare persuasi. Læta observationum illarum summam, simul ac ad me pervenerint, cum publico communicabo. Efficacior Cortex præsertim in illis regionibus desideratur, ubi a paroxysmorum febrilium summa violentia tantum plerumque imminet periculum. In sequentibus observationibus non nisi de Corticis rubri usu in morbis febrilibus ago: plura tamen facta possideo, quibus probari potest, eundem in aliis morbis, in quibus Cortex communis opem adferre solet, majorem etiam præstantiam exhibere.

Cortex ruber in hanc regionem fortuitò introductus est. Navis Hispanica Limâ Gades destinata anno 1779. a navi anglica armatâ capta & Ulyssipponem ducta est. Præsertim onerata erat hoc Cortice. Pars immediatè in hanc regionem allata fuit, major Ostendam missa, ubi vilissimo pretio a quibusdam Pharmacopolis nostris Londinensibus empta est. Cistæ, quibus includebatur, ejusdem omnino fabricæ erant, ac illæ, in quibus communis Cortex ordinariò continetur, & omnis sub generali QUINQUINÆ denominatione venditus est. Cum dotibus externis a communi Cortice tam evidenter differret, hinc Pharmacopolæ, primi possessores, difficulter eum poterant divendere. Tandem Pharmacopœis, in illis locis degentibus, ubi intermittentes endemicæ sunt, eum in specimen obtulerunt. Fausti eventus ejus usum secuti eos illico de majori ejus efficacia convicerunt. Statim itaque in Nosocomia introductus est, & præstantiores ejus vires generaliter sunt vindicatæ. Ab eo tempore in Nosocomiis *D. Bartholomæi*, *D. Thomæ*, *Guyano* & *Londinensi* perpetuò in usu est. Fama itaque rubri Corticis melius stabilita, & unanimiti multorum Medicorum testimonio certius

confirmata est, quam quodvis aliud materiæ medicæ punctum. Affirmant mihi omnes Pharmacopolæ, quibuscum de hac re sermonem habeo, hunc Corticem generaliter jam & instanter peti. Constat mihi etiam in sufficienti quantitate nunc posse obtineri, & cum non amplius sit sub exclusivo paucorum mercatorum imperio, præjudicatæ Pharmacopolarum opiniones sensim incipiunt deleri. Jam ab aliquo tempore nihil mihi amplius de nocivis ejus ob nimiam activitatem dotibus objectum est.

Probè gnarus quam difficile sit facta stabilire, quibus Medicamentorum vires, aut aliud punctum ad animalem œconomiam spectans probetur, sententiam plurium ingeniosorum & sedulorum Medicorum, quibus frequens occasio fuerat rubrum Corticem tentandi, efflagitavi. Hanc cautelam eò magis necessariam judicavi, quia convictus sum novitatis amorem & nimiam credulitatem, facta admittendo, quæ dubiis autoritatibus nitebantur, magis Medicinam, quam quamvis aliam scientiam corrupisse, & eidem plus nocuisse, quam absurdissimæ & futilissimæ hypotheses, quarum errores facilè plerumque deteguntur.


DE CORTICIS RUBRI QUALITATIBUS SENSIBILIBUS.

Constat frustis largioribus & crassioribus, quam Cortex Peruvianus communis. Evidenter constat tribus stratis: extimum tenue, inæquale, coloris rubro-fusci est, & plerumque musco regitur. (e) Medium crassius, magis compactum & coloris est obscurioris. Hoc admodum fragile est, & manifestò majorem quantitatem materiæ inflammabilis, quam quævis alia Corticis species, videtur continere: ut hinc appareat præcipuè in eodem resinofam hujus Corticis partem hærere.

Intimum fibrosam, ligneam substantiam exhibet, & coloris rubri magis rutili est.

Frusta integra eo modo franguntur, quo secundum Materiæ Medicæ Scriptores præstantissimæ notæ Peruvianus Cortex frangi oportet.

Dum in pulverem redigitur stratum medium, maximam resinæ partem continens, magis quam alia strata, pistillo resistit. Ad hoc



(e) Nuper optimum rubrum Corticem vidi, cujus exterior facies erat coloris albicantis, & interior obscurè rubri. Admodum resinofus, compactus & ponderosus erat.

præsertim attendi debet, dum in pulverem tenuissimum reductus adhibetur. Odor ejus, qui in pulvere vel solutione melius detegi potest, manifestò magis aromaticus est; sapor magis amarus quam Corticis communis.



HISTORIA EJUS CHEMICA ET PHARMACEUTICA.

EXPERIMENTUM PRIMUM.

UNciæ unæ Corticis rubri in pulverem tenuissimum reductæ additæ sunt unciaë sedecim aquæ distillatæ. Post infusionem viginti quatuor horarum liquor cautè percolatus est. Idem experimentum cum Cortice communi institutum est.


Duæ hæ infusiones multùm colore differebant. Cortice rubro facta multo obscurioris erat: ejusdem odor & sapor multò magis evecti erant, quam alterius. Secundùm judicium plurium spectatorum Virorum, qui utramque Infusionem gustarunt, Infusio frigida rubri Corticis evidenter magis saturata erat, quam fortissima Decoctio Corticis communis.

EXPERIMENTUM SECUNDUM.

Unciis duabus Infusionis frigidae rubri Corticis addebantur viginti guttulæ *Tincturæ Florum Martialium*. (f) Mixtum illico induit colorem obscuriorem, pelluciditatem amittit, & post breve intervallum pulverem nigrum deposuit.

EXPERIMENTUM TERTIUM.

Unciis duabus Infusionis frigidae Corticis communis eodem modo addebantur guttæ viginti *Tincturæ Florum Martialium*. Mixtum aliquamdiu pelluciditatem retinuit; postea colorem obscurum induit: nihil tamen, ut in secundo experimento, in fundum præcipitatum est.



(f) FLORES MARTIALES.

R: *Colcoth: Vitriol: vel Limat: Ferri* lib: j.

Sal: *Ammon:* lib: ij.

Misc. & sublimentur in retorta. Sublimatum cum residuo in fundo retortæ denuo misceatur, & reiteretur sublimatio, donec flores prodeant coloris lætè flavi.

Pro conficienda *Tinctura Florum Martialium* sumuntur uncie quatuor *Flor: Martial:* & *Spir: Vini Rectificatissimi* pinta una. Diger. simul, tum liquor colet.

Interpres.

EXPERIMENTUM QUARTUM.

Unciæ uni Corticis rubri in pulverem grossum redacti additæ sunt unciæ sedecim aquæ distillatæ. Ebullierunt simul ad medietatis consumptionem : tum liquor calidus adhuc per linteum trajectus est. Idem experimentum, eisdem cautelis servatis, cum Cortice communi institutum est. Decoctum rubri Corticis, non minus ac ejus infusum, saporem & odorem manifestò præstantiores & magis effectos exhibuit. Majorem etiam quantitatem resinosæ substantiæ sub refrigeratione deposuit, quam Decoctum Corticis communis. Colore pariter evidenter differebant.

EXPERIMENTUM QUINTUM.

Unciæ uni Corticis rubri in pulverem grossum redacti additæ sunt unciæ octo *Spiritus Vini probati*. Post hebdomadæ digestionem Tinctura percolata est.

Idem experimentum, eisdem servatis, cum Cortice communi repetitum est. Tam Tinctura illa Corticis rubri, quam ejusdem Resina additione aquæ præcipitata gustatæ, saporem fortiolem, ut etiam odorem, exhibuerunt, quam eadem præparata Corticis communis.

Tinctura hæc spirituosa Corticis rubri etiam magis colorata est, quam altera.

EXPERIMENTUM SEXTUM.

Utrique residuo supradictarum Tincturarum denuo additæ sunt octo unciaë *Spiritus Vini probati*. Utrumque mixtum stetit in balneo arenæ per spatium viginti quatuor horarum. Postea in infusione remanserunt per hebdomadam. Interim de tempore in tempus, ut occasio se obtulit, agitata sunt : tum percolata. Tinctura Corticis rubri evidenter alterâ fortior apparuit.


Utraque Tinctura experimenti quinti & sexti leni calore ad consistentiam resinosi Extracti evaporata est.

Extractum Corticis rubri læve, homogeneum, inspissatum Balsamum Peruvianum æmulans se præbuit. Tincturæ suæ saporem & odorem omnino servabat.

Alium evidenter aspectum Extractum Corticis communis habuit. Crassum videbatur & granulofum. Nullatenus etiam Tincturæ suæ dotes retinuerat.

Quantitas Extracti Corticis rubri multò major erat, quam Extracti ejusdem ponderis

Corticis communis : verùm , cum neutrum residuum absolutè iners redditum sit , exacta proportio determinari nequit. (g)



(g) Viginti sex libris Corticis rubri additæ sunt viginti sex congii *Spiritus Vini probati*. Post protractam digestionem Tinctura distillata reliquit Extracti Spirituosi libras duodecim & dimidiam. E residuo quatuor libræ Extracti Aquosi obtentæ sunt.

In alio experimento triginta libræ Corticis rubri inferioris qualitatis eodem modo tractatæ suppeditarunt tantum undecim libras & dimidiam Extracti Spirituosi , & quatuor libras & dimidiam Aquosi.

Eadem quantitas optimi Corticis Peruviani communis ad summum tantum largitur libras septem & dimidiam Extracti Spirituosi.

Observari meretur facta hic adducta niti autoritate præclari Pharmacopœi , qui in utroque experimento quantitatem extracti ordinaria methodo e data quantitate Corticis rubri obtentam accuratè annotavit. Animadvertat etiam Lector , quod Spiritus Vini pro paranda hac Tinctura adhibitus fortè quidem Resina saturatus fuerit , sed quod residuo non fuerit affusa nova ejusdem quantitas , quæ , omnem resinofam partem extrahendo , majorem proportionem Extracti Resinosi suppeditasset , & consequenter paucum vel nullum Extractum Aquosum reliquisset. Quamvis hæc experimenta eo intuitu non fuerint capta , ut in publicum prodirent ; ea tamen satis accurata esse persuasum habeo. Magis profectò concludunt , quam experimenta cum multò minori quantitate Corticis instituta.

EXPERIMENTUM SEPTIMUM.

Parvum coclear utriusque Tincturæ in experimento quinto præparatæ duabus unciiis Aquæ infusum est. Resinosa præcipitatio Corticis rubri non solum copiosior erat, quam Corticis communis; sed etiam celerius vitri fundum petebat. Præterea, quantum ex odore & sapore judicare licuit, major quantitas substantiæ rubri Corticis in Aqua soluta remansit; quam alterius.

EXPERIMENTUM OCTAVUM.

Experimenta ingeniosi D. PERCIVAL amici mei imitatus guttas aliquot *Spiritus Vitrioli tenuioris* addidi unciiis duabus infusi Aquosi utriusque Corticis. Acidum plus de sapore suo amisit in infusione rubri Corticis, quam in altera.

EXPERIMENTUM NONUM.

Decoctum utriusque Corticis præparatum est capiendo utriusque unciam eandemque coquendo in pinta & dimidia Aquæ ad pintam unam. Decoctum rubri Corticis præstantia & viribus multò alterum superabat, ut in experimento quarto notatum est. Utrique Decoc-

tioni altera Aquæ pinta affusa est , & iterum decocta ad pintæ consumptionem. Decoctum Corticis communis sensim tum videbatur qualitates Corticis sensibiles amittere : illud rubri Corticis eas continuo servabat.

Eadem quantitas Aquæ denuo utrique affusa est , & decoctio toties repetita , donec congius Aquæ consumptus esset. Tum Cortex Peruvianus communis ferè iners redditus erat : ruber dotes suas sensibiles non multum alteratas adhuc retinebat.

Hoc experimentum probat vulgarem praxim Corticem decoquendi ejus vires minuere.

D. SKEETE Barbadenfis , Juvenis ingeniosus & diligens , in Nosocomio Guyano Medicinæ studiosus , votis meis satisfactorius varia experimenta instituit , ut proportionem inter vires antisepticas rubri Corticis & illas communis stabiliret. Ex illis constitit Infusionem Corticis rubri multò meliùs & diutius putredinem a materiis animalibus arcere , quam infusum , vel ipsum etiam decoctum communis. Revera Decoctio Corticis vulgaris post pulveris subsidentiam minùs amara erat , & animale materiam pro breviori tempore præservabat , quam

rubri Infusio. Hæc experimenta, adhibita summa cura & servatis omnibus cautelis, capta sunt, eorumque exitus plurimum præclarorum Vidorum examini in Nosocomio Guyano subiectus.

Ex allatis experimentis hæ conclusiones deduci possunt,

Primò, Corticem rubrum tam in Aqua quam in Spiritu Vini altero solubiliorem esse.

Secundò, eundem multo maiorem quantitatem Resinæ & particularum activarum continere.

Tertiò, partem ejus activam, licet multum dilutam, qualitates suas sensibiles in eminentiori gradu retinere, quam saturatissima solutio Corticis communis.

Quartò, eundem Decoctione non pati illam partium decompositionem, quam patitur Cortex communis.

Quintò, vires ejus magis adstringentes esse quam Corticis Peruviani vulgaris.

Sextò, vires ei magis antisepticas esse. In ulteriorem demonstrationem hujus asserti observari potest, tam frigidam ejus Infusionem,

quam Decoctionem mense Junio in laboratorio Nosocomii Guyani omnem amaritiam & alias dotes medicas per quinque hebdomadas, & fortè diutius, inalteratas retinuisse: ubi interim Decoctum Corticis communis paucis diebus mutationis notas exhibet. Pulvis sub refrigeratione per totum liquorem diffusus manet in Corticis rubri decocto, quod ob eam causam etiam sub quiete onustum manet & turbidum. In communis Corticis decocto pulvis celeriter fundum petit. Continet itaque ruber Cortex magnam copiam Mucilaginis, qualem Decocto communis Corticis addendam esse proposuerat nuper D. FOTHERGILL, eo intuitu, ut resinosæ partes perfectiùs in liquore suspenderentur, & ut decoctum etiam repositum turbidum maneret. Obvium est hoc principium ventriculi actionem & Corticis rubri digestionem egregiè adjuturum.

Majus ergo beneficium a rubro Cortice expectari potest, quam ab ulla quantitate communis. Communis cum rubro collatus iners apparet & effoetus.

Omnia hæc experimenta superiùs allata coram pluribus spectatis Viris instituta sunt.

Opinio Corticem rubrum ita posse Aquam frigidam imprægnare & medicatam reddere, ut certius febres intermittentes curaret, quam Decoctum vel ipse etiam pulvis Corticis communis me movit præsertim, ut hanc materiam prosequerer. Persuadebar in primis, quia qualitates sensibiles Infusi frigidi rubri Corticis, secundum allata experimenta, tam multum præstantiores sunt, quam decocti communis.

Non posse negari arbitror allata experimenta, quæ omni adhibita cura instituta & pluries repetita fuerunt, sufficienter stabilire, quod Cortex ruber qualitatibus sensibilibus communi multum præstantior sit, & majorem copiam possideat particularum resinotarum & activarum, in quibus omnes Medici & Materię Medicæ Scriptores virtutem & efficaciam Corticis crediderunt consistere.



GENERALES CORTICIS EFFECTUS IN CORPUS HUMANUM.

SEquentes annotationes applicantur Cortici vulgari; verum persuasum habeo enumeratos hic effectus certius & præstantius a Cortice rubro produci.

Corticis infusio frigida videtur manifestò appetitum excitare & digestionem promovere. Tonum intendit & consequenter auget actionem stomachi: unde succus gastricus, genuinum solidorum alimentorum Menstruum, perfectiùs elaboratur.

In pluribus casibus Cortex potiùs alvi tarditatem, ordinarium effectum vigoris & roboris intestinorum, producit. In larga dosi tamen generaliter vires purgantes exercet: verùm post breve spatium cessat hic effectus.

In sanitate & omnibus ferè morbis, qui sine febre sunt, pulsum fortiolem & pleniolem reddit.

In febribus nervosis & malignis, præsertim sub remissione pulsum fortiolem & simul tardiolem efficit.

In casibus particularibus, ubi magna debilitas febrim concomitatur, & aliqua remissionis indicia se produnt, quamvis typum admodum irregularem fervet, calorem febrilem minuit.

In febribus, quæ inflammationem topicam vel universalem diathesim phlogisticam comitem habent, quæ præcipuè pulsu, modo inva-

dendi , secretionum difficultate vel defectu , & molesto vel dolorifico functionum exercitio indicantur , calorem animale[m] auget , & omnia symptomata intendit.

Profusas & colliquativas evacuationes , præsertim cutaneas , sistit ; quamvis insensibilem perspirationem , aut alias excretiones naturales non videatur minuere.

Omnem propensionem in putrefactionem & gangrænam , modò atoniam comitem habeant , cohibet : sed inconsultè adhibitus , dum cordis & vasorum actio violentior est , vel nimium prævalet inflammatoria diathesis , utramque promovebit. Verosimilius videtur vires ejus antisepticas dependere a virtute tonica , quam in solida exercet , quam ab aliqua actione specifica in fluida animalia.

Fortè hæc doctrina explicare posset effectum remediorum , quæ in Scorbuto adhiberi solent. Morbus hic contrahitur , intertinetur & auge-
tur omnibus illis causis , quæ debilitatem inducunt. Manifestò illum præcedit vis vitæ imminuta ; ut secundariò tantum , & non nisi

posito solidorum morbo , fluida animalia affici
& alterari videantur. (*h*)


In pluribus casibus bonam suppurationem
promovet , & saniosam aut ichorosam evacua-
tionem mutat in pus laudabile.

Hic effectus unicè deduci potest e generali
ejus virtute tonica : universalis enim vel localis
atonia suppurationem impedit , & pertinaciam
ulcerum mali moris intertinet.

Ex eodem principio ejus virtus generatio-
nem boni puris in Variolis promovendi concipi
potest.


In sola debilitatis periodo adhiberi potest.

Vidi Ægros in Variolis confluentissimis tem-
pore suppurationis Cortice indigere , qui in
progressu morbi , dum secundaria febris cum
novo rigore & inflammatoriis Peripneumoniæ
veræ notis illos invadebat , solis tempestivè
institutis & repetitis Venæsectionibus fuerunt
servati.



(*h*) *An enquiry into the source from whence the symptoms
of scurvy and of putrid diseases arise. By Dr. MILMAN.*

In Subjectis irritabilibus & delicatioribus, quæ specialius Affectionibus Scrophulosis obnoxia videntur, & quæ plerumque affliguntur peculiaris speciei inflammationibus, tonica potius quam evacuantia requirentibus, Cortex Peruvianus optimum Remedium est. Quæ de Scorbuto superius diximus, probabiliter hic applicari possunt.



DE EJUS USU IN CURA FEBRIUM INTERMITTENTIUM.

QUæ circa hoc punctum notanda habeo debentur sedulæ & accuratæ Observationi. Omni præjudicata opinione liber, nulli particulari Theoriæ, nulli Systemati cæco nexu adhærens hanc rem perspexi.

Licet nimium cauti & timidi Practici generaliter Corticis usum prohibuerint ante institutas evacuationes, experientia tamen edoctus persuasissimum habeo, in Febribus intermittentibus endemicis, præcipuè in demissis & paludosis locis sævientibus, quales frequenter circa Thamesis ripas & in depressioribus hujus Metropolis partibus occurrunt, Corticem non

nimis festina manu posse adhiberi. Emeticorum & purgantium usus, titulo præparatoriorum, non solum non necessarius est, sed etiam in aliquibus casibus, quia nimiam inducit debilitatem, evitandus.

Concoctionis doctrina, utut vera in Febribus continuis & quibusdam casibus inflammatoriis, intermittentibus tamen productis a demissi & paludosi soli miasmatibus, quæ præcipuum harum Febrium fontem in hujus urbis viciniis constituunt, applicari nequit.

In hac opinione me confirmat testimonium CELEB. CLEGHORN & aliorum, qui sæpissimè in primo morbi insultu Corticem adhibere necessarium judicabant, ut secundum paroxysmum, qui in pluribus certè lethalis fuisset, vel averterent omnino, vel minuerent. CELEB. LIND circa hanc rem optimè annotavit, illa symptomata, quæ plerumque Cortici attribuuntur, potius paroxismo ob hujus Remedii neglectum redeunti deberi.

Varia dantur symptomata, quæ, nisi a febre intermittente dependerent, usum Corticis prohiberent: talia sunt tussis, respirandi difficultas, & dolor lateris. Hæc frequenter simul

cum paroxismo Ægrum invadunt , & solo Cortice simul cum paroxismo tolluntur. Diversam & separatam curam hæc symptomata non admittunt ; sed evacuantibus , præcipuè venæsectionibus , quæ in ordinariis Febribus depuratoriis opem adferre solent, semper augentur.

Intermittentem Febrim cum hæctica aliquando complicatam vidi , ut utriusque paroxysmum bene distinguere potuerim. Cortex intermittentem fugando hæcticam repressit ; quamvis hæctica, præsertim dum phthisis pulmonalis symptoma est, Cortici numquam videatur cedere. Hinc probabile arbitror, quod quamvis in cura intermittentium cum aliis morbis complicatarum prima intentio ad intermittentem dirigi debeat , quandoque tamen necessarium sit alicui indicationi ex altero morbo desumptæ, modò intermittentis curæ non repugnet, satisfacere. In Hydrope intermittentium comite majus beneficium ab usu Corticis salibus neutris , vel aliis lenibus diureticis juncti , vidi , quam a fortioribus purgantibus , quæ semper intermittentem protrahunt. Quilibet febris paroxysmus magis & magis confirmat

firmat causam illius morbi secundarii , quem produxit.

Negare hic non intendo casus occurrere , in quibus Emeticum malè & imprudenter omittetur. Præcipuè id locum obtinet in illis , qui biliosis accumulationibus in primis viis obnoxii sunt ; sed potius eo intuitu tum adhibetur , ut id , quod Corticis operationi obstaculo foret , amoveatur , quam ea necessitate , ut tutus sit Corticis usus. Plerumque nauseam & vomitum tam symptomata vidi , ut solo largo Corticis usu vinci potuerint.

Methodus magis absurda , quam illa prævias evacuationes instituendi invaluit , & fautores suos invenit : ea scilicet post peractam Cortice Peruviano intermittentium curam purgantia adhibendi. Hæc cum corpus debilitent , & debilitas ad intermittentium assultus maximè disponat , rarissimè non producit recidivam.

Pro illis , qui usu Corticis alvum adstrictiorem habent methodum ordinariam , pauca grana *Rhei* vel *Pilul: rufi* adhibendi approbo. Si e contra vires purgantes edat , aliquæ guttulæ *Tincturæ Thebalcæ* usitatus & optimum Remedium efficiunt.

Febres intermittentes sæpissimè symptomatibus adeo anomalis stipantur , & quandoque tam accuratè larvam aliorum morborum induunt , ut imperitus vel inattentus Medicus decipi possit. Sub quavis tamen specie , sub quavis typo Cortici , aliis remediis quandoque juncto , cedunt.

Non exigua experientia requiritur , ut paroxysmus intermittens , sub diversa omnino specie quandoque ludentis , detegatur , & quamvis Cortice promptius remedium non existat , violentia tamen alicujus symptomatis morbum concomitantis & naturalem ejus formam obnubilantis aliam subinde , peculiari rerum statui adaptatam , medelam exigit ; idque non tam , ut Cortex postea tutum fiat Remedium , quam ut se præbeat efficacior.

Indoles sævientis constitutionis epidemicæ plurimum potest in producendis irregularibus illis symptomatibus. Præsertim frigoris stadium sistunt & interturbant. Generaliter tempore paroxysmi multùm augentur.

Morbi , quos cum intermittentibus complicatos observavi , pro maxima parte erant indolis biliosæ , quales autumnò occurrere so-

lent: ut Vomitus violenti & immodici, Diarrhææ torminosæ, Cholera morbus, Cephalalgiaë periodicæ, dolor lateris: non rarò morbi inflammatorii, ut Pleuritis, Peripneumonia & Rheumatismus acutus: aliquando etiam affectiones spasmodicæ in Apoplexiam & Mortem terminatæ.

Omnes hi morbi nihil aliud quam hujus febris varietates esse & eisdem Remediis, quibus regularis intermittens, cedere crediti sunt.

Nullam tamen in natura analogiam existere arbitror, qua hæc doctrina stabiliri possit, & rationi nullatenus consentaneum videtur supponere, quod eadem causa tot diversas species queat producere. Profectò, imperium, quod epidemica constitutio in morbos sporadicos exercet, manifestò probat, corpus humanum pluribus causis eodem tempore posse affici, & remedia in simili casu circumstantiarum diversitati esse approprianda. Medici itaque munus est dignoscere, quis plurium istorum morborum, quibus corpus humanum eodem tempore afficitur, primam attentionem & curam requirat. Experietur in genere, quod febris intermittens, si ejus paroxismus tam violentas in

corpore turbas excitet , & alterius morbi symptomata multum augeat , illico fugari debeat.

In aliquibus casibus tamen signa tam urgentia praevalentis inflammationis cum intermittente conjuncta & sub calore febrili tam aucta vidi , ut nisi amplam quantitatem sanguinis , qui in illis casibus semper phlogisticus erat , detrahi jussissem probabiliter actum fuisset de Aegri vita. Talia inflammationis symptomata curam febris intermittens impediunt , & ideo quam primum amoveri debent.

Probabilis ex his ratio erui potest , cur febres inflammatoriae , deposita ferocitate , saepius in intermittentem desinant.

Eodem modo , antequam stomachus ferendo & digerendo Cortici aptus sit , & febris auferri valeat , necessitas potest occurrere appropriatis Remediis curandi Vomitus symptomaticum , Cholera morbum &c.

Cortex Peruvianus primario fugandis genuinis & idiopathicis febribus intermittens accommodus est ; non symptomaticis , quae diversam plerumque medelam petunt.

Circumstantiæ, quæ Medico agendi modum præscribere & ejus gressus dirigere debent in tractandis febribus intermittentibus complicatis, in hujusmodi tractatu magis præcisè determinari nequeunt. Neque hujus loci est designare illas Ægri conditiones, quæ, ut Cortex tutò adhibeatur & efficax sit, aliorum Remediorum prævium usum vel eorundem cum Cortice unionem requirunt.

Videntur mihi non alio intuitu alia Remedia debere adhiberi, quam ut morbus cum febre intermittenti complicatus, quique eam protraxisset vel Corticis usum interturbasset, priùs amoveatur; sed nullatenus, ut futuri illi effectus, qui falsò plerumque Cortici Peruviano adscribi solent, dum non nisi febris pertinaciæ vel imperfectæ ejusdem curæ debentur, avertantur.

Tam autumnalis quam vernalis intermittens SYDENHAMI illo vincitur: prior tamen cum majori pertinacia & difficultate quam posterior.

In multis casibus rubri Corticis efficaciam in fugandis tertianis & quartanis, quæ Cortici ordinario restiterant, expertus sum. Neque tamen id mirum videbitur illi, qui diversi-

tatem virium diverſarum ſpecierum ipſius Corticis ordinarii perſpexerit.

Vitio mihi non vertendum ſpero ſi in ſalutares effectus, quos ſæpe ab Opio in febribus intermittentibus adhibito expertus ſum, paululum digrediar. CELEBERRIMO LIND præſertim hanc methodum debemus. Adeo efficaciter vim paroxiſmi tam frigoris ſtadium contrahendo quam coloris febrilis violentiam ſedando moderatur, ut ſæpiùs hoc ſolo intermittentes fugari poſſe credere tentarer. Re tamen propiùs perſpecta, hac ſpe fruſtrabar.

Ejus vim in pluribus centenis caſibus expertus cum CELEB. LIND concludo, „Opiata ſtatim in caloris febrilis principio adhibita, „ paroxiſmi violentiam & durationem minuendo, „ Ægri conſtitutionem tam inalteratam conſervare, ut ab eo tempore, quo „ Opium in intermittentibus præſcribo, neque „ Hydrops neque Icterus ullum meorum „ Ægrorum intermittenti laborantium affligerit, „ In initio ſtadii exhorreſcentiæ granum unum *Extracti Thebaici* præſcribere ſoleo, vel, cum minus ſpatium, ut in ſtomacho

dissolvatur, requirat, sub caloris accessione guttas viginti *Tincturæ Thebaicæ*.

Cortex ruber virtute aromatica & calida tam præstantior altero est, ut omnes effectus expectatos ab unione Cardiacorum, Aromaticorum, Serpentariæ & similium, quæ ad obstinatissimas ætate provectorum quartanas laudari solent, videatur adimplere.

Aliqua occurrit opinionum diversitas quoad modum Corticem adhibendi. Maxima Medicorum pars in eo consentit, ut eum in substantia assumptum promptius, quam sub alia quavis forma, febrim fugare contendat. Quantitas ad domandam intermittentem requisita, sub hac forma, ampla & nauseosa dosis est. Quovis modo præscribatur melius in liquore aliquo diffusus propinatur, quam in Electuarium vel Pillulas redactus, quæ difficulter aliquando in stomacho solvuntur.

Lac Corticis saporem felicius, quam quodvis aliud vehiculum, obvolvere eundemque Infantibus acceptiorem reddere observavi. Similiter Extractum Liquiritiæ Aqua solutum, ut ejus sapor tegatur, adhiberi potest, vel Vinum aliquod, præsertim Rhenanum vetustum.

Ex eo, quod Cortex in substantia generaliter potior credatur, sequi videretur ejus Decoctum, Infusum & Tincturam, in quavis etiam quantitate exhibeantur, nimis debilia & domandis febribus intermittentibus imparia inventa fuisse: alioquin illa Corticis præparata, cum Stomachum minus gravent & promptius agant, præferri debuissent.

Confido me demonstraturum, Corticem rubrum quamvis speciem Corticis communis quoad illa multum præcellere: non solum etenim longè minor ejus pulveris dosis, sed etiam Decoctum & Infusum intermittentes fugat.


Tempore inter paroxysmos medio & vacuo stomacho optimè Cortex assumitur. In quartanis, quæ duos apyrexiae dies relinquunt, præsertim desideramus, ut pridie paroxysmi ægro magna ejusdem quantitas propinetur, & in aliis intermittentibus tempore ad paroxysmi futuri insultum tam prope accedenti, quam stomachus pro ferendo Remedio permittit.

Maximi ponderis argumentum pro Corticis rubri usu mihi tam Pharmacopolæ quam ægri suggererunt: dimidiam scilicet quantitatem dosis requisitæ Corticis ordinarii ad curandum.

sufficere. Variis etiam experimentis mihi constitit Corticem rubrum frequentissimè subsequendum paroxysmum avertere & febrim quasi unico ictu fugare ; dum Cortex communis sensim tantum intermittentis vim infringit. Rarissimè plus quam dimidiam dragmam omni apyrexiae bihorio exhibere necessarium inveni, & numquam ultra sex dragmas ad fugandam febrem, etiam quartanam, inter duos paroxysmos propinare debui. Sæpiùs expertus sum duplam quantitatem Corticis communis expectato effectu caruisse.

Inutile tamen est dosim definire. Omni horâ dragma assumi potest ; modo stomachus ferat, & ea quantitas in aliquibus casibus fortè morbum promptiùs superabit, quam minor dosis, longiori temporis spatio intermisso, repetita. (i)

Sequentia facta manifestò probabunt me temerè sententiæ, qua præstantiores Corticis rubri vires stabiliuntur, non adhæsisse.



(i) Sæpe etiam methodum celeb. HOME secutus sum. In declinatione febris imminuto jam sudoribus caloris stadio ille Corticem præscribit. Præsertim id convenit dum brevis apyrexia duos paroxysmos intercedit.

EDUARDUS VIRGOE annos viginti & unum natus per quinque mensium spatium febre intermittenti laboraverat. Primò tertianæ typum servabat; post in quotidianam regularem mutata est. Tussi, Dyspnœa & Raucedine, præsertim sub paroxismo, æger vexabatur. Cortex Peruvianus communis ad dragmam integram omni hora assumptus paroxisum quidem fugaverat, sed non obstante continuato hujus Remedii usu, febris post aliquot dies redierat. Tandem assumpta per decem dies omni bihorio dragma Corticis rubri integrè curatus est.

Ex hoc casu, ut & pluribus aliis, qui mihi obvenerunt, apparet febres intermittentes, etiam mali moris & cum aliis morbis complicatas, quæ Cortici communi & aliis Remediis restiterant, Cortice rubro fuisse sublatas.

Hanc meam sententiam confirmat experientia & testimonium plurium præclarorum Medicorum, qui adeo rubro Cortici favent, ut quotidie magis & magis, præcipuè in adjacentibus Provinciis, ubi intermittentes frequentiores & pertinaciores sunt, expectatur.

His visis suspicari cœpi vires frigidae ejus Infusionis in pluribus casibus sufficere curandis intermittentibus, & in omni alio casu producendis iis effectibus, qui a Cortice communi sub quavis forma adhibito expectari possunt.

Casus sequentes stabiliendae huic opinioni sufficiunt.

J. YOUNGMAN, ætatis sedecim annorum, pluribus mensibus tertiana laboraverat. Molestia tussi sub paroxismo vexabatur, & ejus vires multum imminutæ erant. Omni trihorio unciaë quatuor Infusionis frigidaë rubri Corticis ei præscriptæ sunt. Post duos dies febris sublata est &, continuato hujus Remedii usu per quatuordecim dies, perfectè convaluit.

T. PUGH vigesimum secundum annum agens a quinque hebdomadibus tertiana laborabat. Præsertim sub frigoris stadio molestè tussiebat. Assumpsit Infusionem frigidam rubri Corticis, ut in superiori casu. Unicum adhuc eumque levem paroxisum passus est. Tussis etiam omnino desit.

J. WELDING, annorum viginti quinque, ab anno circiter febri intermittente vexabatur.


Typum quotidianæ fervabat. Largam quantitatem Corticis communis frustra absumpserat. Postquam per tres dies singulis viginti quatuor horis libras duas frigidæ Infusionis rubri Corticis sumpserat, disparuit paroxysmus & deinceps non rediit. In initio Ægro alvus mota est, sed brevi desiit hic effectus. Sub Infusionis usu vires & appetitus continuò augebantur.

Ab eo tempore, quo prior hujus opusculi editio in lucem prodiit, multiplici mihi constitit experientia de Infusionis frigidæ rubri Corticis efficacia; sed requiritur, ut diutius cum ea insistatur, quam dum Cortex in substantia e vino exhibetur. Casus tamen mihi occurrerunt, in quibus stomachus Corticem in substantia rejiciebat, & febris illico frigida Infusione fugabatur, dum ad uncias quatuor omni apyrexiaë bihorio assumebatur. Casus etiam vidi, ubi intermittens cum aliis morbis adeo complicata erat, ut majori cum cautela & magis gradatim agendum esse judicarem: hinc frigida Infusio tutiùs propinabatur quam ea dosis Corticis in substantia, quæ uno ictu febrem potuisset jugulare.

Dum sublata febre , ne recidivet , aliquò tempore cum Cortice infistendum esse judico, non ad aliam Corticis præparationem quam ad Infusionem frigidam , omnium gratissimam , in hunc finem recurrere suadeo. Maximum ab ea emolumentum observavi, dum ejus usus post intermittentes aliasque febres in convalescentiæ statu continuatur.

Longam possem huc adferre seriem casuum, qui mihi tam in publica quam in privata praxi obvenerunt, & quibus proposita doctrina confirmaretur ; sed faustæ praxis summam indicare sufficere ratus sum.

Infusio frigida in dictis casibus adhibita præparata erat affundendo duabus uncis Corticis rubri subtilissimè pulverisati libras duas Aquæ frigidæ & mixtum sub viginti quatuor horarum infusione sæpiùs agitando. (*k*)



(*k*) Quamvis casus superiùs allati manifestò probent Infusionem frigidam febres intermittentes curare , non tamen in eum finem citantur , ut alii iique efficaciores hoc Remedium adhibendi modi negligantur.

DE EJUS USU IN CURA ALIARUM FEBRIUM.

FEbres remittentes plerumque tam statâ periodo exacerbantur & remittunt, quam intermittentes; sed illarum apyrexia incompleta & imperfecta multis dubium movit, an tutus foret adversus illas Corticis usus. Cum sæpissimè symptomatibus stipentur, quæ indicant biliosum fomitem in primis viis hæerere, opinio Emeticum ante Corticis usum adhibendi optimè fundata videtur, & hac methodo perfectior ordinario remissio obtinetur.

In remittentibus tamen calidiorum Regionum insultus paroxysmi adeo vehemens est, & Ægri vires tam subito prostratæ, ut absolutè necessarium sit primam opportunitatem aliqualis remissionis arripere, & Corticem larga manu, ut in intermittentibus solemus, adhibere.

In febribus remittentibus attentius observanda & curanda sunt symptomata concomitantia, quam in intermittentibus; quia magis specialiter periodum remissionis turbant, interrumpunt, & diminuunt; hinc in calidioribus

Regionibus, non obstantibus præjudicatis opinionibus, ut cephalalgiae, pectoris oppressioni, cutis intenso ardori & siccitati aliisque symptomatibus paroxysmum protrahentibus succurratur, utile quandoque est aliquot sanguinis uncias detrahere. Talibus adhibitis mediis remissio sæpiùs obtinetur, & Cortex deinceps feliciori cum effectu propinatur.

Febres hujus Regionis rarò regulariter remittunt; nisi prius evacuationes, in inflammatoriis scilicet Venæsectiones & in biliosis Emeticum atque Purgantia, rite adhibitæ fuerint.

Quando febris ad statum manifestæ remissionis redacta est, id est, dum intra viginti quatuor horarum spatium particulari periodo pulsus celeritas ad decem aut viginti ictus minuitur; dum inquietudo, anxietas & propensio ad delirium minuuntur; dum os & fauces madent; dum secretionum organa, præcipuè cutis, aperta sunt & pervia, Cortex tam liberè & tutò sub his symptomatibus, quam in intermittentibus adhiberi potest.

Rheumatismus acutus, non obstante insultu ejus inflammatorio & sanguine phlogistico, quamvis etiam articuli per plures hebdoma-

das inflammari pergant , ab initio remittentis febris speciem assumit.

Sub his conditionibus cum antiphlogisticis insistere generaliter inventum est inefficax. In pluribus similibus casibus Infusionem frigidam rubri Corticis adhibui , & morbus soli huic methodo videbatur cedere.

Rheumatismus acutus in suis remissionibus speciem duplicis tertianæ assumit , & Æger plerumque profusis sudoribus paroxysmum terminantibus multum debilitatur.

In his casibus præcipuè Corticis usum laudo. Hanc methodum efficaciorē & rationi magis consentaneam inveni , quam usum *Volatilium* & *Guajaci*.

Tædium & inefficacia methodi antiphlogisticæ in cura Rheumatismi acuti particulariter in hunc morbum me attentum reddiderunt. Cum continuò optato effectu frustrarer , & consequenter usitata methodus , optimis Authoribus tam veteribus quam modernis , qui hanc rem tractarunt , laudata , mihi minùs satisfaceret , alia media , quæ feliciùs mihi successisse puto , tentare decrevi. Febris rheumatica ,

matica, non obstante inflammatoriorum symptomatum violentia, videtur mihi intermittens larvata esse, &, ut supra jam notavi, tertianæ duplicis periodos habere. Antequam tamen ut intermittens tractari possit, inflammatoria ejus symptomata moderatis Venæsectionibus, interpositis pro re nata Purgantibus & multis Diluentibus sedari debent: quamvis mihi moderatus Corticis usus, ut vires præviis & necessariis venæsectionibus prostratæ erigantur, non videatur repugnare ideæ morbi inflammatorii; neque ideæ febris intermittens, quod symptomata inflammatoria, quæ febrem anomalam reddunt, Antiphlogisticis Cortici fociatis moderanda sint & reprimenda.

Hac methodo in multis casibus febrim rheumaticam magnopere diminutam vidi, & articulorum torpori ac debilitati, ut etiam dispositioni ad Rheumatismum Chronicum, quæ omnes plerumque hujus morbi sequelæ sunt, semper provisum fuisse expertus sum.

E natura pulsus, proclivitate in profusos sudores, urinæ sedimento, frequenti rigoris invasione videtur mihi Rheumatismus acutus

febris intermittens esse , quæ ob statum Inflammatorium articulorum solitam & naturalem formam induere impeditur.

Hunc morbum quandoque merè topicum, nulla scilicet feбри inflammatoria stipatum vidi. In hoc casu , postquam Hirudines articulis applicari , & Hæmorrhagiam fomentis promoveri jussissem , larga manu Corticem exhibui ; & hunc nunquam, dummodo ab aliis , quæ inflammationem augere possunt , cavebatur , symptomata inflammatoria expertus sum exasperasse. Generalia itaque & vaga præcepta de Corticis Peruviani propensione ad augendam in omni casu inflammationem ratiocinatione ex ejus viribus & actione deducta frivola sunt, & nisi feliciter Experientia & Observatis correctæ fuissent , beneficium ab ejus usu in febribus rheumaticis , inflammationibus scrophulosis & fortè aliis bene multis morbis perceptum nobis eripuissent.

In subjectis delicatioribus & irritabilibus inflammationes rheumaticas articulorum feбри lenta nervosa stipatas vidi , quæ soli Cortici Opiatis juncto cedebant.

In febris rheumatica generaliter circa septimum ab invasione diem Infusionem frigidam rubri Corticis exhibere incipio. Tres uncias singulis duabus aut tribus horis, donec circa vesperam paroxysmus ingruat, præscribo. Sub hoc remedio neque a venæsectione tam universalis quam topica, neque a purgantibus, prout occurrentia symptomata poscunt, abstineo.

In febris illa *Lenta* sub titulo *Nervosæ* tam graphicè ab HUXHAMO delineata, dum cutis mollis erat, & pulsus pauciores quam centum & decem ictus in minuto primo dabat, frigidam rubri Corticis Infusionem cum bonis *Ægri* rebus præscripsi.

In similibus febribus præcipuè, tamquam Cardiacum, vim vitæ sustinendo agit, & eo intuitu videtur mihi in omnium morborum febrilium decremento, quoque ubi symptomata in morbi invasione manifestò inflammatoria sunt, posse adhiberi.

Ferè omnes morbi febriles sub decremento remittunt.

Febres verè *Putridæ* & *Malignæ* putridis vaporibus & miasmatibus productæ rarò in hac

urbe occurrunt. In Classibus, Castris & locis, ubi aër non renovatur, vel Animalia arcto nimis spatio concluduntur præcipuè sæviunt.

In his morbis cura efficitur Emetico & Cardiacis calefacientibus. Inter posteriora eminet Cortex ruber.

In his casibus, ut vis antiseptica juvetur, Vino infundi potest.

Acidis etiam optimè unitur, & præstantes effectus ex hac unione in his morbis possunt expectari.

In *Febribus Putridis Anginâ Gangrænosa* stipatis multoties Corticis efficaciam expertus sum: cavendum tamen ne hic morbus cum *Angina Mucosa* HUXHAMI, vel cum *Angina Erysipelatosa* GRANTII confundatur. Posteriores, quamvis etiam contagiosi & eruptionibus cutaneis stipati, maximè tamen inflammatorii sunt, & evacuationes postulant.

In *Febribus Petechialibus* cum signis maximæ virium prostrationis frequenter pulsum naturali non celeriore & calorem animale ferè non auctum vidi. Hic usum Corticis Vino veteri rhenano infusi laudo.

Febrem ab aëre non renovato , qualis in carceribus sævire solet (*Jail Fever*) non aliis symptomatibus distinctam vidi , quam Petechiis & magna virium prostratione. Lingua nullatenus conspurcata; pulsus non acceleratus , sed parvus erat : in secretionibus nihil videbatur turbatum. Vesicantia extremitatibus applicata, Cortex & Vinum optima in his casibus remedia sunt.

In genere febres symptomatibus debilitatis notatas præcipuè remittere experimur. Ideo usum Corticis bene admittunt , quia hic tonum & vigorem systematis vasculosi augendo redeunti paroxismo se opponit.

Febres , in quibus cordis & vasorum actio violentior est , quales sunt inflammatorii, non remittunt vel saltem non tam manifestò; donec ea violentior actio evacuationibus temperata sit: ita ut sub decremento tantùm videantur remittere.

Primus insultus omnium ferè febrium in hac regione comitem habet violentiorem cordis & vasorum actionem , quæ aliquando prudenter apertâ venâ ; frequentius tamen *Tartaro Eme-*


tico, infusione *Sennæ & Salibus Neutris* optime temperatur.

Omnes febres, quæ cum magno rigore, quem magnus excipit calor, invadunt, subitas evacuationes postulant: illæ verò, quæ lentè irrepunt, & vertigine potius quam capitis dolore, magna anxietate, vigiliis, tremore & debilitate stipantur, Opiata, Corticem, Serpentariam & Vinum poscunt. Vesicantia brachiis applicata ad erigendam cordis actionem admodum efficacia sunt. Præcipuè dum cutis mollis, lingua & fauces sufficienter humidæ sunt adhiberi possunt. Posterius hoc symptoma observando, plus quam passim creditur, dignosci potest.

Oportet tamen distinguere inter oris & faucium ficcitatem, quæ febris symptoma est & inter illam, quæ ex eo oritur, quod Æger ore aperto dormiat.

Spero observationes, quibus incomparabilis hujus Remedii præstantia defenditur, in his pagellis orbi medico oblatas, omnem præjudicatam opinionem adversus Corticem latiore & crassiore, quam ille qui hætenus in usu fuit, amoturas.

Undique jam & enixè petitur. Spero difficultatem eum in sufficienti copia comparandi Mercatores & Pharmacopolas non inducturam, ut ei spuriam speciem aliarumve Arborum Cortices substituunt.



EXTRACTUM EX EPISTOLA

D. EDUARDI JACOB

*Junioris, Chirurgi dexterrimi Fevershamiæ
in Cantii Provincia.*

Tot occasiones nactus sum rubrum Corticem tentandi, ut votis tuis in stabilien-
dis præstantioribus ejus viribus me facile satisfacturum sperem.

Loca paludosa hinc non procul distita febres intermittentes hic multò frequentiores efficiunt, quam in Urbibus & interioribus hujus Regni Provinciis passim esse solent, & sanctè assero ante Corticis rubri usum intermittentes nostras ob particularem pertinaciam (ut tum credebamus, vel ut jam observavimus ob Corticis ordinarii inertiam) verè *Opprobrium Medicorum* potuisse appellari. Hoc dedecus jam sublatum arbitror: nullus etenim hætenus

casus mihi obvenit , dummodo præscripto obsequi Ægro poteram persuadere , in quo ruber Cortex defecit.

Optima species Corticis Peruviani in tenues tubulos convoluti mihi ante in usu erat ; minus tamen promissis effectibus stabat.

Menſe Martio 1781. notitiam rubri Corticis primò conſecutus ſum. Aliquæ libræ pro tentandis ejus viribus tum mihi miſſæ ſunt, Indicabat Pharmacopola eum in Noſocomio D. BARTHOLOMÆI jam indè in uſu eſſe , & efficacem ſe præſtitiffè. Intentatum tamen uſque ad ſubſequentem menſem Majum ſervavi. Invadit me tum febris periodica , & tamen de adhibendo rubro Cortice necdum cogito : ſperabam etenim magnam quantitatem Corticis ordinarii , mihi nullatenus ingrati , ſumendo me morbum facilè fugaturum. Spe tamen fruſtratus fui , & ſine ullo aſſumpti remedii effectu paroxiſmus paroxiſmum exce- pit. Novum itaque Corticem tentare ſtatuo ; ſed omnia febris pertinaciæ adſcribens primas vias ante Emetico & Purganti evacuò. Im- diatè poſt has cautelas declinante paroxiſmo dragmam unam rubri Corticis in ſubtiliſſimum

pulverem redacti tribus unciiis ejusdem Decocti immixtam , addita parva quantitate ejusdem Corticis Tincturæ assumo. Hunc haustum multo Cortice saturatum stomachus in initio ægrè tulit. (Idem pluries in meis Ægris expertus sum absque eo quod hic effectus Corticis efficaciam minueret.) Datis itaque brevibus induciis , idem Remedium repetii & insistere potui. Ab eo momento sublata febris est ; donec post aliquas septimanas recte valens & Corticis usum deferens levia symptomata , pro vero paroxismo nullatenus tamen numeranda, denuò passus sim. Repetitus tum Cortex morbum radicatus evulsit.

Patrem meum septuagesimum jam annum agentem ab eo tempore febris periodica invasit. Cum in initio solis horripilationibus sine subsequenribus aliis manifestæ febris symptomatibus vexaretur, tres paroxismos sine ullo Remedio sustinuit. Tum ingravescente morbo de intermittentis realitate convictus hujus Corticis Decoctum cum pauxillo ejusdem Tincturæ mixtum assumpsit. Adeo efficax ei hoc Remedium se præstitit, ut deinceps febris non redierit. Cum nimis citò tamen Corticem omisisset levem paroxisum denuò passus est.

Eodem itaque remedio per aliquot dies repetito omnino liberatus est & optima jam fruitur valetudine.

Tot ægri novi Corticis beneficio pristinae sanitati restituti sunt, ut illorum numerum præcisè determinare nequeam.

A mense Julio 1781. in hunc usque diem circiter sexaginta libras hujus Remedii præscripsimus. Dum eo intuitu dedimus, ut instantem febris paroxysmum fugaremus, pulveris dragmam dimidiam vel integram in duabus uncis Decocti & parva quantitate Tincturæ exhibuimus. Decoctum nostrum parabatur tres hujus Corticis grosso modo pulverisati uncias in quatuor libris Aquæ coquendo ad medietatis consumptionem.

Dum Æger constitutionis delicatioris erat, vel dum tamquam roborans adhibebatur, Decoctum & Tincturam sine addito pulvere præscripsimus. In intermittentibus recenter contractis rarò aliud Remedium quam Corticem exhibuimus: in inveteratis & pertinacibus curam evacuantibus aggressi sumus. Pulveris uncia dimidia sine evacuantibus plerumque Ægrum sanavit: in casu recenti major quan-

titas requirebatur. Visâ novi Corticis efficacîâ, veterem & omnia ejus præparata omnino relinquimus. Dum Æger non nisi pilulas poterat assumere in multis casibus novi Corticis Resinam cum successu præscripsimus.

Hæc tibi satisfactura ex animo spero : finitûs ; novis investigationibus impofterum conabor supplere.

Subscribor, &c.

EDUARDUS JACOB Jun.

Fevershamiæ 23. Junii 1782.



E P I S T O L A

D. B O Y S

*Præclari Chirurgi & Pharmacopœi Sanduici
in Cantii Provincia.*

DOleo me tibi particulares casus, quibus Corticis rubri efficacia probaretur, non posse transmittere. Cum in scriptis nihil circa hanc rem annotaverim, in genere tantum affirmare possum præstantiorem Corticis Peruviani speciem esse, quam hætenus mihi experiri contigit. Utrum intermittentes pertinaciores fue-

rint , vel Cortex ordinarius minùs efficax
dirimere nolo : id certò scio nos in hujus
morbi cura , donec novum Corticem obtinui-
mus , solito sæpiùs fuisse deceptos.

Nulla ratione inducor , ut hoc Medicamen-
tum ultra merita laudibus efferrem ; sed asserere
possum id meam expectationem , dummodo
Æger ritè assumere voluit , ne semel quidem
hactenus scellisse. Præstantiores itaque ejus
vires firmiter persuasas habeo , & eo magis in
hac opinione confirmor , quod meam senten-
tiam cum vestra & illa omnium Medicorum
in vicinis locis praxim exercentium , qui hunc
Corticem tentarunt , sciam congruere. Opus-
culi vestri publicationem avidus exopto , non
solum quia propagando notitiam & usum
incomparabilis hujus Remedii generi humano
scio profuturum , sed etiam quia spero idem
effecturum , ut nova hujus Corticis copia
citius adferatur : pauca enim ejus mihi quan-
titas superest , & unde mihi nova suppeditetur
ignoro.

Subscribor &c.

G. Boys.

Sanduici 19. Junii 1782.

Existimationi rubri Corticis a pluribus Medicis ruri degentibus confirmatæ additamentum est Epistola ab aliquot diebus recepta, ad me 16. Junii 1782. data a G. BISHOP præclaro Chirurgo Madi in Cantii Provincia.

Longâ casuum serie Author in illa probat Corticem rubrum in curandis illius loci intermittentibus non solum Cortice communi aliisque Remediis in his morbis adhiberi solitis se multò efficaciorē præstitisse, sed eundem etiam radicitus morbum curasse, adversus quem Balnea frigida, Emetica, Opiata, Amara, Frictiones & uncia sedecim Corticis communis, tam per se quam variis aliis Remediis juncti, frustra fuerant adhibita. Sub Electuarii forma, addito pauxillo Olei Essentialis Menthae Piperitidis aut Carui, ordinariò exhibet, & rarissimè casum habuit, in quo sex uncias hujus Remedii præscribere necesse fuit. Casum memorat, in quo febris malignæ spha-celus delirio aliisque pravis symptomatibus stipatus supervenerat, & Æger rubro Cortice, Anodinis & Vino servabatur. Benigna suppuratio sphacelatas partes separabat, & febris aliaque mala signa citò evanescebant.

*Altera Epistola varias doctas & sagaces
animadversiones continens ab eodem G.
BISHOP 23. Junii benignè ad me data est.*

Corticem rubrum in pollinem subtilissimum mola redigere, tum per arctissimum cribrum trajicere suadet, eo intuitu, ut levior stomacho sit, & partes ejus intimiùs inter se misceantur. Observat Resinam aurea bractea imitantem in medio strato videri posse, si Cortex diffringatur & fractæ partes sub sole microscopio considerentur. Idem Experimentum in Cortice communi instituendo manifestò patebit rubrum majorem quantitatem Resinæ continere.

Dragma vel scrupuli quatuor Corticis subtilissimè pulverisati non ingratiore sunt & tam facile assumuntur, quam scrupuli duo in pulverem grossum, sub quali apud Pharmacopœos passim prostat, redacti. Dragmam unam pro singula dosi ordinariò exhibet, ægros tamen habuit, qui duas tresve dragmas uno haustu assumere malebant, ut longiori intervallo fruerentur, & hanc methodum, modò stomachus ferat, ad fugandas febres magis efficacem se expertum asserit. Quidam Æger, qui tempo-

re duodecim horarum tres uncias assumpserat, a pertinacissima quartana unico ictu liberatus est.

Intermittentes, quæ minoribus dosibus non cedebant, aucta dosi & sæpiùs repetita sublatae sunt.

In quotidianis & tertianis quinque vel sex horas ante paroxysmum indicat sufficere, ut Corticis rubri quantitas avertendo insultui necessaria assumatur. Aliquibus pro integra cura duæ unciae immediatè post paroxysmum captae suffecerunt: prudentiùs tamen egerunt, nec non feliciùs & citiùs convaluerunt, qui donec quatuor vel sex uncias consumpsissent in ejus usu perseverarunt. Animadvertit etiam illos, quorum sanguis maximè dissolutus est, & quorum solida profusissimis sudoribus relaxata sunt, quod in obstinatis quartanis frequenter solet accidere, maxima Corticis quantitate indigere.

Quotidianæ pro cura parvam quantitatem hujus Remedii requirunt: tertianæ minoribus dosibus, quam hujus Provinciae quartanæ, cedere solent.

Octo vel decem dierum spatio quinque vel sex uncias hujus Remedii assumere melius &

cærtius statuit , quam pro eadem quantitatè longius tempus adhibere.

Operarii , qui sub diò frigidis & humidis matutini temporis horis ; in locis paludosis vel uliginoso solo , aut a solis ortu usque ad rorem vespertinum laborant , & madidos profusis sudoribus vestes sæpe ad humeros siccare sinunt , a quartanæ recidiva tuti esse nequeunt ; nisi ab ultimo febris paroxismo quinque hujus Remedii uncias absumpserint : probabile etenim est omnes ante assumpti Corticis effectus supervenienti primo recidivæ paroxismo perditos esse & dissipatos.

Reflectit quoque Corticem etiam larga manu præscriptum irregulares febris paroxismos , quibus illi excruciantur , qui Phthisi pulmonali laborant , & in quorum pulmonibus pus colligitur , non sublaturum.

Epistolæ D. G. BISHOP , quæ has animadversiones continent , plures etiam pretiosas instructiones circa alia Artis Medicæ objecta comprehendunt , quas data occasione sagacem Virum Authorem cum publico spero communicaturum.

EPISTOLA

E P I S T O L A

D. WITHERING,

*Medici celeberrimi Birminghamiæ data 29.
Junii 1782.*

GAudeo te rubri Corticis Peruviani descriptionem & historiam prælo dare suscepisse. Multum profectò commodi hujus rei publicatio afferet : aliquos enim instruet, aliorum præjudicatas opiniones delebit, & Mercatores tandem exstimulabit, ut amplam copiam pretiosi hujus Remedii sibi adferri curent. Intermittentes universaliter hoc vere prædominantes multa nobis experimenta suppeditarunt, quibus hujus Corticis efficacia probetur. In Urbe Birminghamiensi non adeo intermittibus vexamur ; sed in aliis, quas adeo quandoque, Provinciæ *Verovici* partibus ; in *Staffordiæ*, *Salopiæ*, *Vigorniae* & *Oxoniae* Territoriis, seniores Medici, quibuscum de hac re sermonem habui, non meminerunt illas umquam frequentiores fuisse.

Cùm obviis quibuscumque Pharmacopœis rubrum Corticem sedulò commendaverim, & postmodum sollicitus fuerim in colligendis eorum circa ejus efficaciam observatis, asserere

possum eos unanimiter affirmare, "quod hic
 „ Cortex adversus intermittentes exhibitus
 „ illorum expectationem numquam fefellerit.,,

Intermittentes, quas mihi videre contigit, ferè generaliter in locis, ubi solum leve est, tertianæ typum servabant; in illis ubi argillaceum quartanæ. Ex illis aliqui se curæ meæ commiserunt, qui a sex mensibus, anno, imo anno & dimidio quartanâ in *Cantii* vel *Icenorum* Provincia contractâ vexabantur, & tamen duo tantum mihi casus occurrerunt, in quibus Cortex ruber futurum paroxysmum non impediit. Alterutrum horum Ægrorum postea vidi. Signis obstructi hepatis & Hydrope anasarca laborabat. His methodo ordinaria quatuordecim dierum tempore sublatis; Cortex ruber illico curam perfecit. Alterius casus, cum Æger procul ab hac Urbe habitet, necdum exitum rescire potui.

Ulterior experientia requiritur, ut certa hujus Remedii dosis statui possit. Medicos novi, qui omni apyrexiae quadrihorio unam vel duas dragmas exhibuerunt. Ego plus quam triginta vel quadraginta grana pari temporis intervallo numquam hæcenus præscribere debui.

Pauca habeo quæ de ejus præparatis afferam ; pro propria praxi enim semper simplicem pulverem præfero. Mihi tamen relatum est oporimam & saturatam Tincturam ex illo confici , & ejus Decoctum vidi , quod coloratissimum erat & turbidum.

Peti posset , an Cortex communis in hujus anni intermittentibus eosdem omnino effectus non præstitisset ? Secundum aliorum Medicorum judicium non videtur : ego e propriis observatis non aliam ad hanc questionem respon- sionem habeo , quam quod Cortex communis adeo frequenter expectationem meam fefellerit , ut solis Evacuantibus , Opio & Salibus Metallicis pro intermittentium cura fretus eum a septem annis in his morbis numquam amplius tentaverim.

Ut ultima hæc assertio cum quotidiana aliorum experientia conciliari possit , intelligi debet , rarò apud nos pro intermittentibus Medicum advocari ; nisi insolitum aliquod symptoma , aut singularis recurrentium paroxysmorum pertinacia Ægrum aut ejus Amicos perterrefaciat.

Utrum hic Cortex ad eandem Arborem pertineat , e qua Cortex ordinarius desumitur ,

vix definiri potest. Ego interim eum idem Medicamentum esse quod MORTONUS & SYDENHAMUS Ægris suis exhibuerunt, & cujus efficaciam tamquam infallibilem laudarunt, persuasum habeo. Quid Materiæ Medicæ Scriptores primò induxerit, ut Corticem tenuem convolutum præferrent, planè ignoro: sed id scio Coriarium anglum; si petiveris uter Corticum quercus, trunci scilicet vel ramusculorum, adstringentior sit & efficacior, ignorantiam tuam risurum.

Epistolam tuam & meam de hac re sententiam Amico meo & Collegæ dignissimo D. ASH impertivi. Me tibi asserere jubet observata sua in summa a meis non differre. Subscribor &c.

G. WITHERING.

P. S. Ita, Vir Amicissime! quid observaverim & sentiam de subiecto, quod meditaris, liberè exposui. Licentiam tibi relinquo has litteras ad eum usum adhibendi, quem volueris. Mihi semper congratulabor, si aliquid ad consilii vestri utilitatem contulero.

Quidquid aliqui Pharmacopolarum Londinensium clamitent, numquam hætenus à rubri Corticis usu nocivos effectus vidi. Quid

illos impellat adeo evidens est, ut commentario non egeat.

Solam distantiam familiaritatem nostram & communicationem interceptisse tecum sentio: sentio tamen etiam distantiam non minuere existimationem & venerationem, quibus iteratò subscribor &c.

G. WITHERING.



E P I S T O L A

D. SHERWIN,

Præclari Chirurghi in Enfield.

AB eo tempore, quo rubrum Corticem adhibemus, felicissimè nobis succedit intermittentium cura. Post usum optimi etiam Corticis communis antea adeo frequenter Ægri recidivam patiebantur, ut tam fama nostra quam Medicamenti existimatio multum concideret, & Ægri non pauci ad Artis Medicæ imperitos confugerent, Agyrtarum arcanis & incantamentis potius confidere rati, quam Remedio, quod toties viderant sefellisse, & cui omnes morbos & dolores, quibus post intermittentes vexabantur, & qui febris imperfectè curatæ passim sequelæ sunt, ingeniosissimè adscribebant.

Amplam enarrationem , qua ordinarii Corticis inertiam probarem , suppeditare possem: verùm , cum communis hæc querela sit , minus necessarium judico. Gratius itaque , ni fallar , erit , si potius historias quorundam casuum , in quibus morbus , qui magnam quantitatem Corticis communis eluserat , rubro etiam in longè minori dosi exhibito illico victus fuit , attulero.

R. PARSLEY Adolescens Operarius & robustus , viginti octo annorum , autumno transacto corripiebatur feбри intermittente , quæ modò quotidianam , modò tertianam , quandoque quartanam typum cum pauca intermissione servaverat usque ad vigesimam aprilis hujus anni. Eo die casu fortuito illum vidi , & sequentem mihi impertiit historiam.

Quæcumque præscripta fuerant sedulò assumserat , & illius Herus , vir nobilis & dignus hic in vicinia degens , variorum Medicorum consilia ei procuraverat. Hi in larga dosi Corticem præscripserant ; sine beneficio tamen , cum fugata febris post aliquos dies cum majori impetu rediret. Addebat ei tandem consultum fuisse , ut unciam dimidiam Aluminis in pinta

Cerevisiæ (*Ale*) ad medietatis consumptionem coctam biberet, & ter hanc potionem, singula vice simul ac persentisceret paroxysmi insultum, repeteret. Hac ratione septem dimidias uncias Aluminis sub invasione totidem paroxysmorum absumpserat,

Susplicabar magnam adeo quantitatem Aluminis uno haustu captam debuisse nocivos quosdam effectus produxisse, & ideo dubitabam an bene totam deglutiisset. Severiori examine instituto constitit tamen eum revera singulis vicibus unciam dimidiam introsumpisse: vasculum etenim de industria agitando Alumen non solum a fundo dimoverat, & ejus pulverem manifestò sub dentibus senserat. A potu sæva Cardialgia correptus fuerat. Tanta Aluminis quantitas una dosi sine noxa hausta inter illa facta, quæ sciri merentur, facile numerabis.

Infortunati Adolescentis fortem miseratus octo doses Corticis rubri, quarum singula dragmam continebat, ei transmissi. Cum febris tum, quartana esset, eas duabus apyrexiae diebus absumpsit. Jam septem exactæ sunt hebdomadæ, a quo hoc Medicamentum adhibuit,

& nullam hæcenus febris recidivam passus est. E contra , ut propria ejus expressione utar , „ se ab hoc tempore sensit , ac si novas partes „ internas acquisivisset.

ANNA PIGOT quatuordecim annorum pauperula , & consanguinea supradicti PARSLEY ab autumnno etiam intermittenti fuerat vexata , & varia Remedia frustra etiam tentaverat. Per quatuordecim dies parvas doses *Vitrioli Cærulei* ei sine beneficio præscripsi. Postea tres quatuorve doses Pulveris aromatici calidi e *Baccis Lauri & Pipere* , quod mixtum sæpe opem tulisse expertus sum , frustra exhibui. Utrum Corticem communem in debita quantitate tentasset ignoro. Idem Medicamentum , quod consanguineum suum curaverat , exposcebat. Jam abhinc mensē tres doses , quarum singula tantum scrupulum continebat , dedi , & sanctè assero illam ab eo tempore ab omni morbo perfectè fuisse immunem.

D. BARNES vir robustus & laboriosus præterito autumnno feбри intermittente delirio aliisque pravis symptomatibus stipatâ corripiebatur. Post tres quatuorve paroxysmos dragmâ Corticis communis omni hora exhibitâ

febrim sustuli. Postea ad præcavendam recidivam bis de die eandem dosim sumpsit. Verùm post quatuordecim dies febris cum solito furore rediit, & denuo assumpta eadem Corticis communis quantitate sublata est. Hac ratione febris ab autumnò usque ad initium Aprilis quinies vel sexies, quatuordecim circiter diebus postquam fugata esset, rediit. Cortex communis recenter in pulverem reductus continuò repetitus est.

Ineunte Aprili sex doses unius dragmæ Corticis rubri ei præscripsi, quas declinante paroxismo absumpsit, & lætus assero illum, quamvis cautelam quotidie idem Medicamentum repetendi neglexerit, nullam hætenus recidivam sensisse.

Casus adferre, in quibus Cortex ruber, intentato communi, curam effecit, operæ pretium non est. Aliqui mihi occurrerunt, & nullum hætenus recidivæ exemplum habeo.

Nuper ad casum gravem, similem illi prædicti D. BARNES, in quo sex vel octo tantum horarum apyrexia erat, arcessebar. Sex dragmas Corticis rubri præscripsi, hæcque æger assumpsit. Paroxismus tamen solita hora invasit, &

sub studio molestissimæ horripilationis omnis, ut videbatur, Cortex per vomitum rejectus est. Subsequens tamen paroxismus paulò mitior fuit. Æger Corticem sub quavis forma valde averfabatur: eum fallendo tamen obtinui, ut tempore subsequæ apyrexix duas dragmas uno haustu deglutiret. Id hoc Medicamentum ei adeo inimicum reddidit, ut deinceps idem repetere absolutè renuerit. Hoc non obstante febris (quod Ægrum gaudio, me stupore affecit) omnino sublata est. Sanationem suam tribus quatuorve haustibus *Julepii camphorati*, quod dum cum Cortice insistere recusaverat, ut nihil agi non videretur, præscriptum erat, Æger attribuebat: potiori tamen jure duabus Corticis rubri dragmis ultimò præscriptis, cum sex primas pro maxima parte perditas credam, adscribenda est.

Acquisitio & introductio Corticis rubri in Materiam Medicam mihi res incomparabilis pretii videtur. Forſan tamen propriè loquendo nobis tantùm renaſcitur aut reſtituitur Medicamentum, quod tempore SYDENHAMI & aliquibus poſt illum annis in uſu erat; dum Artis Medicæ Scriptoribus familiare prover-

bium erat : ” hoc vel illud Remedium tam cer-
 ,, tè curaturum , quam Cortex intermitten-
 ,, tem. ,, Cortex, qui a multis annis nobis in
 usu est, numquam profectò hoc encomium
 meruit.

Antequam Corticis rubri præstantia mihi in-
 notesceret varia tonica , ut *Cuprum Ammonia-*
cum , *Vitriolum Gæruleum* , *Sal Vitrioli* , *Sal*
Martis &c. mediocri in genere cum successu ,
 felici tamen hinc indè cum eventu tentaveram.

G. KING Juvenis athleticus præterito au-
 tumno opem meam implorabat. Vexabatur
 irregulari tædiosa intermittente , quam dolor
 lateris acutus, pulsus plenus & durus, tussis
 molesta & rauco comitabantur. His stanti-
 bus symptomatibus Corticem sub aliqua forma
 exhibere mihi minùs tutum videbatur. Ve-
 næsectionem itaque eamque amplam institui ,
 Vesicans loco dolenti applicari jussi , & De-
 coctum *Taraxici* cum *Tartaro Solubili* &
Melle in magna quantitate sumendum præ-
 scripsi. Morbus manifestò febris intermittens
 erat , sed symptomatibus Phthisim pulmona-
 lem minantibus stipabatur. Sanguis detractus
 adeo Phlogisticus erat , ut ideo quater venam

fecari iusserim. Hæ evacuationes, cum dicto Decocto & diæta stricta, antiphlogistica, tussim & dolorem lateris sustulerunt. Febris Ægrum tamen torquere perrexit. Octo doses Corticis ordinarii, quarum singula dragmam pendebat, tandem præscripsi, quæ pro pluribus septimanis febrim fugarunt, & ægri habitum egregiè emendarunt. Post sublatam febrim duas quotidie doses assumere perrexit. Id frequentes ei narium Hæmorrhagias excitavit.

Febris ea hieme bis rediit, bis eidem Cortici facilè cessit, & Æger satis rectè valuit: donec adventante Vere & dominante frigido Borea non solum febris intermittens recidivam pateretur, sed etiam vexaretur dolore lateris, & tumidam, ictericam faciem proderet. Post institutam denuò Venæsectionem & usum Apozematis per mensem, ei sex dragmas Corticis rubri mense Aprili præscripsi, & lætus vidi eum ab hoc tempore, licet post febris fugam ne vel ullam Corticis dosim sumpserit, ab intermittente omnino liberatum esse.

Postquam febris sublata esset cum Cortice insistere volebam, ne sanguinis circulum ni-

mium intenderet, & denuò narium Hæmorrhagias excitaret.

Profectò methodum post sublatam intermittentem in Corticis usu perseverandi jam omnino rejeci. Ab aliquo tempore enim suspicatus sum id nihil boni præstare, & fortè aliquando causam esse, ob quam magna quantitas boni Corticis frustra exhibetur.

Notum est intermittentes cujusvis typi Cortice fugatas intra quatuordecim dies, quamvis quotidie in ejusdem Remedii usu perseveretur, plerumque recurrere. An quotidianus Corticis usus corpus humanum hujus Medicamenti effectibus adeo non potest assuefacere, ut, dum postea adversùs recidivam exhibetur, iners factum sit & inutile?

Satis jam factum arbitror, dum paroxismi recursum impedire potui. Nihil præterea quam Anodinum præscribo, ut invadente recidivæ frigoris stadio id paratum habeatur. Ægro de cætero in hoc casu consulo, ut declinante primo recidivæ paroxismo eandem Corticis quantitatem, quam antea necessariam expertus est, assumat. Pauco tempore antequam Cortex ruber mihi innotuit, hanc methodum adop-

tavi eamque proficuum credidi : sed sex aut octo dragmas Corticis rubri inter duos paroxifmos exhibendo tam bene jam res mihi succedit, ut rarò unam etiam dosim repetere hætenus opus habuerim. Subscribor &c

J. SHERWIN.

In Enfield 23. Junii 1782.

E P I S T O L A
D. F O T H E R G I L L,
Medici Londinensis celeberrimi &c.

Amice Vir !

BEnignissimæ postulationi vestræ responsurus, quas potero instructiones circa novum Corticem, nuper, sub nomine CORTICIS PERUVIANI RUBRI, in praxim introductum, tibi impertiar. Cum in navi Hispanica a nostris capta inventus fuerit, & aliquam quantitatem Corticis ordinarii admixtam haberet, mihi nihil aliud videtur esse quam productum trunci & majorum ramorum ejusdem Arboris. Manifestò easdem qualitates sensibiles possidet, sed in superiori gradu : ut hinc majorem copiam Extracti Resinosi, ut etiam Decoctum & Tincturam magis saturata præbeat. Hinc quoque provenit (ut tu nuper annotasti & ego ob-


fervavi) quod ejus Decoctum diu aëri aperto exponi possit , absque eo quod illum acoris gradum contrahat , qui paucis diebus Decocto Corticis ordinarii accidit.

Jam a multis annis notatum est Corticem Peruvianum sæpe omnium expectationem fefellisse , & præstantem illam efficaciam , ob quam a superioris sæculi Scriptoribus tot encomiis celebrabatur , illi defecisse. Paucos omnino modò alicujus praxis Medicos invenies , qui primarium suum Specificum etiam a regulari intermittente delusum quandoque non doluerunt ; absque eo quod aliam hujus defectus probabilem causam assignare possent , quam Medicamentum adhibitum minùs genuinum fuisse. Ex eo sequi videretur , vel intermittentes posterioribus annis ex natura sua magis pertinaces fuisse , vel Corticem , quo usi sumus , inferioris qualitatis & minoris efficaciae , quam ille , qui a SYDENHAMO & multis præclaris hujus viri contemporaneis , de quorum veracitate rationabiliter dubitari nequit , adhibebatur. Posterius mihi probabilius videtur ; præsertim dum consideratur a multis annis morem ramusculorum Cortices , sub *Corticis Convoluti* nomine , seligendi , eosque

(nescio ob quam rationem) latiori trunci Cortici præferendi invaluisse. Hæc præferentia , si posthac probari possit minus fundatam fuisse , (id quod a longo tempore suspicatus sum) multum fortè conferet , ut , cur Cortex toties promissis effectibus non steterit , explicari possit.

In arte coriaria experientia jam dudum pro latiori Quercus Cortice , tamquam ad depensandas pelles ramusculorum Corticibus multum præstantiori , litem diremit. Utrum hujus contrarium in Medicina locum habeat nulla ratione evidens est ; præsertim si vires medicæ Corticis Peruviani proportionatæ sint ejus viribus adstringentibus.

Medici Hispani , ut nuper certior factus sum , adeo de hac re convicti sunt , ut perpetuo latioris Corticis speciem præferant , & , dum in usus alicujus momenti adhibent , tenuiora frustra ab ea separent & rejiciant , quod nuper capta navis revera probabile reddit. (1) Futuræ



(1) Illud tamen non intelligi debet de latis illis fibrosis & ligneis fragmentis , quæ maximam plerumque partem vilissimi Corticis ordinarii constituunt : hæc enim , cum exteriori Tunica & simul resinosis Cellulis jam indè orbata fuerint , merè ligneâ constant substantiâ & nullas vires medicas possident.

observationes hunc verum & genuinum Corticem esse, quo Majores nostri cujusvis speciei intermittentes, ea certitudine, quam modo eorum nepotes mirantur, jugulabant probabiliter detegent.

Si Cortex e majoribus ramis desumptus efficacior probetur quam Cortex ramusculorum, nonne rationi consentaneum erit credere Corticem trunci vel potius radicis utrumque viribus superaturum? timendum tamen est, ne rationes politicæ ad conservationem Arborum, tam lucrosam mercaturæ partem producentium, spectantes indigenas ab omni hujus generis experimento deterreant.

Præclarus Pharmacopola, qui magnam partem hujus navis oneris divendidit, mihi asserit multos Pharmacopœos, quibus Corticem rubrum impertiit, & qui sedulo illius effectus cum illis ordinarii Corticis contulerunt, nullatenus hæsitare, ut rem pro rubro Cortice deciderent. Addit ulterius eundem a paucis tempore tam rapidè expeti, ut quantitas allata jam tota ferè exhausta sit.

Dolendum est, pro usitato more entia multiplicandi, furorem huic innocuo febrifugo

alia amara & adstringentia admiscendi nimium adhuc in Praxi Medica prævalere. Sub falsa specie ejus efficaciam intendendi, vires plurimum possunt diminui, & Experimenti exitus, quidquid post adhibitum tale mixtum eveniat, semper æquivocus redditur. Eo intuitu ut hoc Remedium justificarem & certior redderem de ejus effectibus, omnem, quam breve temporis spatium permisit, opportunitatem arripui id purum & sine aliorum Medicamentorum additione adhibendi. Casus in quibus præcipuè tentavi febres lentæ putridæ erant, quas summa virium prostratio, sub vespertina exacerbatione delirium, nec non de die Breves & dubiæ remissiones comitabantur.

Ut brevis sim, unicum modò exemplum adferam. G. HENTON, Serici Textor, hujus speciei febre, Petechiis & profusa narium Hæmorrhagia stipata laborabat. Posterius symptoma sub febris exacerbatione continuo recrudescibat. Accesserunt sudores frigidi, delirium cum musitationibus, vellicationes involuntariæ &c. antequam Ægrum inviserem Cortex ordinarius præscriptus, & de miseri rebus actum esse pronunciatum fuerat. Sub hoc sta-

tu, admodum certè ancipiti, rubrum Corticem in appropriatis diluentibus, Spiritu Vitrioli acidulatis præscribere non timui. A duobus itaque scrupulis ad dragmam omni bihorio assumpsit, excepto tamen sub nocturna exacerbatione, qua stante ab hoc Medicamento abstinere strictè injunctum est; quia experientia & sedula observatione jam a multo tempore convictus sum omnia generaliter febrilia symptomata, dum aliquod Corticis præparatum hac periodo exhibetur, exasperari. Æger bene Remedium tulit: Hæmorrhagia sedata, & febris citò sublata fuit. Aliquæ jam elapsæ sunt hebdomadæ, & nihilominus summa cum voluptate addere possum illum, dum nuperrimè ejus conclave ingrediebar, mihi læto vultu asseruisse se ab eo tempore, quo rubrum Corticem (aut ut magis propriè fortè jam deberet dici, *verum Corticem*) assumpserit, nulla hactenus sensisse recidivæ symptomata & , si levem visus debilitatem, de qua jam ante morbum conquerebatur, exceperis, ab omni morbo esse immunem. Si hoc Medicamentum in variis aliis febrium typis eandem efficaciam præstare imposterum inveniatur, idque in minori dosi quam Cortex ordinarius, objectum

certè pro Ægrorum rebus maximi momenti & Medico gratissimum evadet : præsertim dum certi de futuro eventu prædicere poterimus :

*. . . Hi motus , atque hæc certamina tanta ,
Pulveris exigui jactu compressa quiescent.*

VIRGIL.

Ex ejus effectû in hoc & pluribus aliis casibus , quos mihi observare contigit , firmiter adducor ut credam Corticem rubrum brevi omnium attentionem excitaturum. De ejus præstantia decretoriè statuere tamen differre cogor , donec plurium casuum , in quibus jam sub tentamine est , eventum rescivero , & ab illis , quibuscum commercium epistolare habeo , & qui minùs , quam ego , pro eo præoccupati , æquiores judices revera supponi debent , ulteriorem confirmationem recepero. Interim itaque opusculi , quam intendis , publicationem impatiens expecto , sperans fore , ut , opiniones & observata variorum hujus Regni Medicorum ita colligendo , tandem stabiliendis Corticis rubri , comparativè ad ordinarium , meritis apti evadamus , quod ut integræ Reipublicæ emolumento & voluptati erit , ita mihi , qui subscribor &c.

A. FOTHERGILL.

6. Julii 1782.

E P I S T O L A

D. EDUARDI RIGBY

Præclari Chirurgi Nordovici.

Amice Vir !

ME multum tibi debere, quod Opusculum tuum de Cortice Peruviano rubro mihi transmittere dignatus sis, gratus agnosco ; at e modo , quo ad litteras tuas meum responsum expetis, video te nimium mihi tribuere.

Inter fortuna numero me rubri Corticis summam & constantem efficaciam abunde testari posse. Omnem opportunitatem nactus sum illum in quavis intermittentium specie tentandi. Eum Ægris sub diversissimis circumstantiis ratione ætatis, temperamenti, morbi durationis &c. exhibui, & e plus quam centum & quinquaginta, qui eodem sub mea cura usi sunt, ne vel casum habui, in quo spem meam fefellit ; sed primo semper momento, quo adhibitus est, paroxysmum fugavit.

Jam a mense Octobris 1781. bonâ fortunâ parcam quantitatem hujus Corticis recepi. Eam debebam amico commercio, quod cum D. TALBOT Chirurgo in Wymoudham intertineo. D. HOPKINS specimen aliquot unciarum,

ut eum tentaret, illi transmiserat. Illico dimidii me participem fecit. Cùm illo tempore Nordovici & in ejus vicinia intermittentes plurimùm sævirent, postridie se occasio obtulit illum tentandi. In hunc finem pessimos, quos tunc potui, duos casus elegi. Prior quartana erat, quæ pluribus mensibus undecim annorum puerum vexaverat, & vires ejus multum infregerat. Alter quotidiana paris ferè durationis, qua Ægra, octodecim annorum mulier, plurimùm quoque debilitata erat. Instanti paroxismo, utrique dimidium granum *Tartari Emetici* exhibui, quo multa bilis stomacho rejecta est. Utrique declinante paroxismo dedi unciam unam Corticis rubri in doses duodecim divisam. Has omnes ante horam, qua futurus paroxismus expectabatur, assumpserunt. Neutri febris rediit, & quamvis cum Cortice non perrexerint (omnem enim mihi transmissum absumpserant) nullam recidivam, nisi post plures hebdomadas, cum aura valde humida esset, passi sunt. Tum febris sponte, sine ullo Cortice, cessit: tunc temporis enim adeo procul remoti erant, ut ad me pro implorando auxilio mittere non possent.

Induxit me faustus horum casuum eventus, ut de ampla quantitate hujus Corticis mihi providerem; qua recepta, illico eum adversus plures tertianas, quas tum sub cura habebam, tentavi, & in omnibus promissum effectum præstitit. Circa id tempus nobilem Ægrum, quinquaginta circiter annorum habebam, qui a tribus & amplius mensibus quartana laborabat. Se ipsum curare annis fuerat variis Specificis popularibus, e quibus unum magnam quantitatem Corticis ordinarii continebat. Postridie paroxismi primò illum invisi. Summopere adhuc ægrotabat: pulsus ejus erat multum acceleratus; appetitus prostratus. Mixturem salinam præscripsi, & haustum aperientem ante futurum paroxysmum assumpsit. Ipsa autem instante febris invasione ei granum unum *Tartari Emetici* propinavi, quod copiosum vomitum excitavit. Dein ejusdem dimidium granum omni trihorio assumpsit donec paroxysmus evanesceret, qui quamvis diu protraheretur, solito tamen longiori & abundantiori perspiratione terminabatur.

Jam Cortex mihi videbatur convenire; sed cum intermissio minùs perfecta esset, quam optassem, & cum præterea necdum haberem

sufficientem observatorum numerum, quibus mihi de merita fama & efficacia rubri Corticis constaret, prudentius duxi Corticem ordinarium adhibere. Assumpsit itaque hujus scrupulos duos toties repetitos, ut plus quam unciam & dimidiam ante expectatum paroxysmum deglutiisset; verum Ægro hujus tentaminis eventus parum profuit; nam nihilominus febris præcedentibus nullomodo mirior successit. Proximâ apyrexia itaque Corticem rubrum tentare statui. Hujus unciam unam in duodecim doses divisam Æger inter duos paroxysmos assumpsit, & posthac ab omni febre immunis fuit. Suasi ut pro aliquo tempore in Corticis usu pergeret, & tres ejusdem similes doses quotidie caperet, quod, donec adhuc uncias duas absumpsisset, fecit. Ab eo tempore omnino ab hoc Remedio abstinuit, & quamvis ejus negotia eum cœli tempestatibus maximè exponant & sæpius postea permaduerit, nullum tamen hætenus recidivæ vestigium passus est.

Ab eo tempore in obviis quibuscumque casibus hunc Corticem audacter exhibui, & idem eventus perpetuò ejus usum secutus est. Inter eos, qui ejus ope sanitati restituti sunt,

plures crura œdematosa, abdomen tumidum & durum habebant; ut in Hydropem præcipiti gradu ruere manifestò viderentur. Præterea plus quam viginti erant pueri, & ex illis duo necdum annum exegerant. Unus ægrotus, cujus casum referam, convincens documentum præbet illius veritatis, quam in opusculo tuo annotasti: methodum scilicet Corticem in magna quantitate, tempore ad futuri paroxismi insultum propissimè accedenti, exhibendi omnium efficacissimam esse.

Æger nobiliserat viginti quinque annorum, robustus, repletus. A quatuordecim circiter diebus vexabatur intermittenti, quæ in principio pro tribus paroxysmis quartanæ typum servaverat; post per tres quatuorve dies quotidiana facta erat. Arcessebar dum posteriorem typum servare inceperat, & febrim admodum intensam inveni. Methodum ordinariam, quam describere supervacuum credo, adhibui; donec Corticem convenire judicaverim. Paroxysmus, post quem eundem assumere incepit, circa horam decimam vespertinam finiebatur, & alter inter meridiem & horam primam expectabatur. Cum brevis esset apyrexia, a dosibus integræ dragmæ in-

choatum est. De nocte nuntius ad me missus retulit Ægrum Corticem omnino averfari, & continuo stomacho ejicere. Suasi ut insisteret, & ut id, quod evomisset, consideraret, ac si non foret assumptum, & ei statim alia dosi suppleret. Inter quintam & sextam matutinam denuo ad me misit, ut eum inviserem. Admodum defatigatum inveni defectu somni, a quo repetitis conatibus Corticem capiendi impeditus fuerat. Exceptâ primâ omnes Remedii doses vomitu rejectæ fuerant, & se stomacho deinceps id Remedium numquam retenturum Æger sibi persuasum habebat. Impetravi tamen, ut statim mediam dosim assumeret, quæ retenta fuit. Aliquo tempore apud eum moratus, post horam & dimidiam eandem quantitatem repetii, quæ similiter retinebatur. Suasi tum, ut singula media hora cum eadem dosi pergeret, & abii. Inter octavam & nonam iterum arcessebar, & eandem narrationem de Remedii vomitione Æger denuo instituit. Hoc non obstante aliam dosim ei propinavi, quam illico, antequam ejus aliquid deglutiisset, ore rejecit. Id observans in modum, quo alias doses evomisset, accuratius inquisivi, & e narratione Ministri omnino con-

victus fui numquam deglutitum fuisse, quod vomitu ejicere putaverat. Infortunata hac Remedii administratione tantum dragmas duas & dimidiam loco quinque assumpserat, & ut unciam absumpsisset remanebant dragmæ quinque & dimidia, quæ tempore trium circiter horarum assumi debebant. Statui tamen, ut insisteret & certus omne quod revera in stomachum dimissum fuerat retentum fuisse, neque amplius timens, ne deinceps vomitu rejiceretur, illico ei dragmam exhibui, & singula media hora, aut ad summum singulis tribus horæ quartis similem ei dosim commendando, totum ante expectati paroxysmi horam absumptum est. Febris hac methodo feliciter fugata est, & ab eo tempore optimè valuit. Nox integra sine somno transacta; ægri angor & defatigatio, tot inanum ad assumendum hoc Remedium moliminum effectus, pravae propriis rebus circumstantiæ erant, & efficiebant, ut febris minùs perfectè, quam aliis vicibus, intermitteret: ejus calor etenim intensior erat, & pulsus celerior, quam pro exhibendo Cortice passim desideratur. Coronavit tamen eventus meam constantiam, & hujus Remedii efficaciam egregiè stabilivit.

Cum multi meorum Ægrorum pauperes fuerint & crassæ Minervæ homines; aliqui etiam tam procul ab hac urbe habitarent, ut tantum generaliores instructiones eis præbere, & nullatenus exactam illorum curam gerere potuerim, facile concipies hujus classis plurimos negligenter hoc Remedio usos fuisse. Scio aliquos præscriptam quantitatem non assumpsisse, & Juvenem rusticum, robustum, septemdecim annorum postea revisi, qui in duabus dosibus unciam absumpserat: omnes tamen illico curati sunt. Hujus classis Ægro, octo annorum puero, qui a duobus & ultra mensibus quotidiana vexatus fuerat unciam dimidiam hujus Corticis præscripseram; ea lege, ut inter paroxysmum, qui circa diei lunæ meridiem terminari debebat & inter illum, qui die martis eadem circiter hora expectabatur, eandem absumeret. Die sabbati sequenti Pater puerum curatum esse renuntiatum venit. Examine instituto, quo modo Æger Cortice usus fuisset, stupui illum tunc temporis nondum dimidiam illam unciam assumpsisse: nam dum illi dixi intentionem meam fuisse, ut puer una die omnem quantitatem caperet, respondit se intellexisse, id tantum inter diem


lunæ & diei sabbati noctem oportere: ita ut manifestum sit puerum prima die non plus quam dragmam assumpsisse, quam tamen ad fugandam febrim sufficere eventus probavit.

Ex allato casu & quibusdam aliis, qui mihi occurrerunt, ut etiam ex illis, qui tibi ab Amico meo D. SHERWIN Chirurgo in *Enfield* communicati sunt, conjici potest multò minorem hujus Corticis quantitatem, quam passim adhiberi solet, votis responsuram. Res parvi laboris foret id ulterioribus experimentis stabilire, sed jam nec in minori quantitate præscribere volo, nec aliis Medicis, donec hujus Corticis fama prorsus stabilita sit, id tentare suadeo: tam diu etenim quam præjudicatæ opiniones aliquorum Practicorum novi cujuscumque Remedii osorum & commodum quorundam Pharmacopolarum, qui amplam copiam Corticis ordinarii possidendo probabiliter damnum patientur, omni nisu generaliori ejus usui se opponent, desiderandum est, ut testimonia pro eo allata non solum solida sint & conspicua, sed etiam, ut ejus successus tam uniformes sint & constantes, quam Remedii natura permittit. Hanc ob rationem, cum quantitas, quam hætenus adhibui, uncia

scilicet pro adultis & proportionatè minor pro pueris dosis, ne semel quidem me fefellerit, quantitatem hanc minuere nollem, ne solito effecta frustrari aliquando periclititer.

Dum paucos hos casus attuli Ægrorum nomina adducere inutile judicavi: sed cum circumstantiæ, quibus novi Medicamenti præstantia probatur, nimis cognitæ esse nequeant, illorum, qui hujus Corticis ope ab intermittenti liberati, & in hac vicinia optime noti sunt, ut memoriæ meæ occurrunt, catalogum addam. (*m*)

Quod ad Corticem Peruvianum ordinarium spectat, non obstantibus summis omnium de ejus inefficacia querelis, ab aliquibus annis meam tamen expectationem non adco fefellit, nec eum tam inertem expertus sum, quam aliis videtur. Fateor revera me ab aliquo tempore solito majorem quantitatem debuisse adhibere, & dum ab uncia & dimidia ad duas uncias in substantia præscripsi non semper illico



(*m*) Author viginti octo Ægrorum, qui Cortice rubro ab intermittente liberati & pristinae sanitati restituti sunt, hic nomina addit. Ea in hac Traductione relinquere supervacuum laborem judicavi. *Interpres.*

paroxysmum potuisse impedire : sed dum ab Ægris impetrare potui , ut in ejus usu & in eadem quantitate perseverarent , fugandæ , post secundam a prima exhibitione intermissionem , febris numquam defuisse novi.

Nulla mihi videntur motiva dari , ob quæ Cortex ordinarius , qui jam ab aliquibus annis in usu est , a pristino aut primitus introducto diversus credatur. Sive in frustis , sive in pulvere ; sive ejus decoctum , vel aliud quodvis præparatum consideretur , quantum e sapore & aliis ejus dotibus judicare licet , mihi saltem omnino idem & talis videtur , qualem semper vidi. Ob hanc rationem naturæ hoc productum degenerasse , aut Pharmacopolas fraude aliqua , qua virtus ejus medica diminui posset , usos esse , ut vendibilior redderetur , aut lucrum augeretur , numquam suspicatus sum.

In his regionibus a duobus annis febres intermittentes frequentiores fuerunt , quam umquam ante fuisse quispiam Medicorum meminit. Probabiliter eadem causâ , quæ eas frequentiores esse fecit , eas etiam pertinaciores , pejoris moris , & consequenter difficilius fugandas reddidit ; ac potius huic causæ , me

judice , quam qualitatis Corticis mutationi , generalis adeo ejus efficaciae defectus attribui debet. In summa itaque ex experimentis cum utroque Cortice institutis & sæpe repetitis persuasum habeo , eos easdem vires medicas , rubrum tamen in longè superiori gradu , possidere. Hæc opinio vestræ suppositioni , eos scilicet ejusdem arboris producta esse ; sed ordinarium e minoribus ramis , rubrum verò e majoribus & trunco desumi , multùm favet.

Hac Corticis specie singulari cum oblectamento usus , ut generalius introducatur , sincerè desidero , & certus sum quemvis practicum , dummodo ritè & sufficienter tentaverit , illico eandem pallidiori seu ordinariæ speciei prælaturum. In alicujus Medicamenti administratione nihil grätius Medico , utpote Ægri animum egregiè erigens , esse potest , quam ejus effectus cum fiducia & certitudine posse referre & prædicere. Hoc attributum , ut etiam virtus in longè minori quantitate Medici proposito satisfaciendi , peculiares Corticis rubri doses sunt. Quamvis etenim non dubitem , quin in majoribus dosibus Corticis ordinarii perseverando plerumque res prosperè cessura sit , aliquando


aliquando tamen maximas difficultates cum Ægris habui , qui eundem in magna quantitate assumpserant, absque eo quod , illico meis votis respondens, post primam ab assumptione intermissionem paroxismi reditum impediisset: post talem defectum enim non semper facile fuit Ægris persuadere, ut in tanta quantitate tam nauseosum Medicamentum assumere perseverarent; præsertim dum a vulgaribus adversus Corticem Peruvianum præjudiciis non omnino immunes erant. Aliquibus recepta opinio est, si non promptam & immediatam opem ferat, eum certè nocere.

Illico litteræ D. TALBOT, quem mihi primum rubri Corticis specimen transmississe superius memini, mihi traduntur. Cum ad subiectum nostrum spectent, earum extractum hanc, jam inde nimis protractam, epistolam terminabit. Me certiore reddit se a tempore, quo Corticis rubri efficaciam primò expertus est, non alio adversus intermittentes usum fuisse, eundemque plus quam quinquaginta Ægris exhibuisse, absque eo quod hætenus casum habuerit, in quo febris illico non fuit remota; licet antea in usu Corticis ordinarii

admodum infelix fuisset. Casum memorat, in quo quatuor unciae Corticis ordinarii frustra adhibitæ fuerant, & uncia & dimidia Corticis rubri illico paroxysmum fugavit. Addit ulterius se nuper in ejus effectus apud quosdam vicinos Practicos, quibus hoc Medicamentum commendaverat, inquisivisse, eundemque D. SWALLOW ex *Watton*, D. BRINGLOE ex *Hingham*, D. GIBBS ex *Buckenham* & duobus tribusve aliis æquè prosperè cessisse. Subscribor &c.

E. RIGBY.

Nordovici 8. Septembris 1782.



E P I S T O L A

D. J. M A D D O C K S

Nosocomii Londinensis Medici.

Amice Vir!

Postulationi tuæ satisfactorius, quæstionum ad Corticem latiore & rubrum nuper in Angliam introductum spectantium, quas mihi proposuisti, solutiones tibi transmittito.

In prima quæstione petis, quid cogitem de viribus medicis hujus Corticis respectivè ad

illas Corticis pallidioris, tenuioris, & convoluti, qui a longa annorum serie in hac regione omnia alia specie præstantior habitus est.

Cum ferius me admonueris, & vix mihi jam otium superfit, in responsione ad hanc quæstionem nec varias morborum species, in quibus opportunitatem habui ejus efficaciam observandi, attingere, nec paucorum illorum morborum, de quibus agam, particulares casus describere potero. Me satisfacisse spero, si mearum observationum summam dederò.

Morbi, qui mihi frequentiores occasiones præbuerunt Corticem rubrum tentandi & in quibus manifestissimè de majori ejus efficacia concludere potui, febres intermittentes fuerunt.

Circiter mense Octobris 1781., si bene meminero, primò Cortice rubro in Nosocomio Londinensi uti incepimus. Differentia, quoad efficaciam, inter hunc Corticem & ordinarium illico adeo animadvertebatur, ut D. DICKSON præclarus meus Collega & ego hujus Nosocomii Curatoribus in hebdomadario eorum conventu commendaremus, ut a Pharmacopola, qui primum specimen suppeditaverat, omnem

hujus Medicamenti copiam, quanta etiam foret, emerent; de quo proposito a Curatoribus sine ulla hæsitazione illico decretum est.

Rarissimè, si umquam, Nosocomium Londinense sine insigni Ægrorum febre intermittenti laborantium numero invenitur: huic rei respectiva *Icenorum* Provinciæ vicinitas non parùm favet. Dum, ante introductionem rubri Corticis, ordinarium in omni casu adhibere solebamus, cum egregiis illis efficaciæ notis, quæ illi a SYDENHAMO ejusque Contemporaneis adscribebantur, multùm destitutum experti sumus.

Quod ad me attinet, asserere possum in casibus febrium intermittentium rarissimè in hoc Nosocomio primo Conatu, quanta etiam Corticis ordinarii copia sub apyrexia adhibita fuisset, paroxysmi reditum impeditum, vel ipsam febris violentiam imminutam vidisse: sed in genere, ut morbi progressus fisteretur, vel febris impetus compesci posset, maximæ doses sæpius ac pro multo tempore repetitæ necessariae fuerunt. In pluribus etiam casibus, cum nihil omnino proficerem, ab ejus usu desistere & ad alia remedia transire convenientius judicavi.

Ab altera parte sæpissimè Corticem rubrum tempore apyrexiae exhibitum a primo momento paroxysmum omnino impediisse vidi. Quod si non effecisset, saltem subsequens febris multum imminuta erat, & morbus in omni casu brevi spatio auferebatur.

In multis horum casuum, in quibus supradictos salutares effectus rubri Corticis observavi, ordinarius præviè tentatus & pro longiori vel breviori tempore frustra continuatus fuerat.

Ægri, qui pro re nata opem & Medicamenta quæsituri ad Nosocomium veniunt, multò numerosiores sunt, quam qui in eodem decumbunt. Inter illos multæ cujusvis typi febres intermittentes occurrunt. In his casibus Cortex ruber se non minùs præstantem præstitit, quam in illis, qui in Nosocomio decumbunt.

Dum Corticem ordinarium adhibere solebam, semper magnæ ejusdem doses ad curam requirebantur, & Ægri denuo & denuo idem Remedium repetituri redibant: sed ab eo tempore, quo rubrum præscibo, plurimi Ægri numquam redierunt. Illorum verò, qui reversi sunt, aliqui retulerunt præscriptam dosim

tempore primæ intermissionis assumptam paroxysmi reditum omnino & statim impedivisse; alii, subsequentes paroxysmos multùm fuisse imminutos. In reliquis casibus, quorum eventum rescire potui, morbus brevi sublatus est.

Unicam morbi speciem attingendo, in qua rubri Corticis præstantiam observandi opportunitatem nactus sum, tibi molestus ero. Comprehendit hæc dolores periodicos, inter quos sæpissimè occurrens, & notissima Cephalalgia periodica est.

Similium tamen morborum casus satis frequenter mihi occurrunt, in quibus variæ aliæ corporis partes affectæ sunt.: in horum aliquibus, ad *Ægri* sensum, doloris sedes sunt parietes Abdominis vel Thoracis, frequentius tamen prioris. In aliis contenta aliqua harum cavitatum pars, sæpius tamen abdominalis, pati videtur.

Plures tales casus, in quibus morbi sedes contenta aliqua cavi abdominalis pars videtur, observavi, & inter illos aliqui mihi occurrerunt, in quibus stante paroxysmo intensâ Pyrexia; dolor acutissimus & plurima vel omnia inflammationis visceris, quod e loco doloris

morbi sedes videbatur , characteristica symptomata aderant.

Hi casus tamen ab inflammationibus differunt , quod intermissio eorum paroxysmum excipiat ; quod periodicè redeant ; ferè semper quotidianam , aliquando tertianam , in aliis casibus minùs regularem typum servant , & quod sanguis sub summa paroxysmi ferocia detractus nullatenus se præbeat phlogisticum. . .

Dum in his morbis , Remediis tempore intermissionis adhibitis , scopus est paroxysmi redditum impedire , tonica procul dubio non semper conveniunt. Eorum aliqui , ut Cephalalgia periodica in subiecto juvenili & plethorico , quandoque evacuationes postulant : sed dum Tonica indicari judicabam , & huic indicationi satisfacturus rubrum Corticem præscripsi , cum in his casibus , respectivè ad Corticem ordinarium , tam efficacem expertus sum , quam in febribus intermittentibus.

Argumenta , quibus sententiam meam de præstantia rubri Corticis in supradictis morbis stabilirem , præcipuè e casibus Ægrorum in Nosocomio decumbentium deduxi ; quia ob majorem numerum meliorem opportunitatem

comparationis suppeditant : sed ex observationibus, quas in privata praxi circa eosdem morbos, ut alios præteream, collegi, eadem conclusiones deduci possunt.

Quid de natura rubri Corticis sentiam ; cujus Arboris productum sit ; an ejusdem quæ Corticem tenuem, convolutum, ordinarii usus largitur ; an diversæ, a me scire desideras. Me judice vix dubium superest, quin ex eadem Arbore desumantur. Eorum qualitatum sensibilibus differentiam non ex alia causa deducendam puto, nisi quod Cortex tenuis convolutus juniorum Arborum, omnes partes adhuc tenuiores habentium, productum sit, vel, si ex adultioribus quandoque desumatur, non sit nisi Cortex ramusculorum : ubi interim Cortex ruber ad adultas Arbores pertinet, & non nisi e trunco vel e majoribus ramis desumitur.

Aliqua argumenta partim a te ipso, partim ab illis, quibuscum de hac re epistolare commercium instituisti, suggesta, quæ in opusculo tuo reperio, ut in hac conclusione persistas, te inducere debent. Ut eandem amplecterer sequentes rationes præcipuè me moverunt.

Primò, quia Cortex ruber qualitatibus suis sensibilibus & aliis a tenui, & convoluto non differt, nisi majori præstantia.

Secundò, quia notissimum est omnium ferè vegetabilium qualitates sensibiles & vires respectivè minùs evectas esse in junioribus plantis & furculis.

Tertiò, quia Coriarii experientia didicerunt quercûs Cortices e trunco & majoribus ramis desumptos vires adstringentiores possidere, quam qui e ramusculis desumuntur, & illos ab hac rationem semper præferunt.

Ultimò, me moverunt a te mihi exhibita Corticum quercus specimina, quæ mihi trunci & majorum ramorum Corticem cum Cortice ramusculorum conferendi opportunitatem suppeditarunt, & clarè monstraverunt latioris speciei Cortices coloris rubicantis esse & expansos; tenuioris verò pallidioris & convolutos; quas differentias in duabus Corticis Peruviani speciebus præcisè observamus.

Unicam adhuc annotationem addam. Nempe, dum summam efficaciam a SYDENIAMO & MORTONO Cortici Peruviano adscriptam & præ-

fertim certitudinem consideramus, qua apud illos Viros febres intermittentes curasse affirmatur ; quas vires Cortici tenui convoluto nemo certè medicorum tribuet ; dum ulteriùs perpendimus descriptiones Corticis Peruviani, qui tum in usu erat , a *Materiæ Medicæ* Scriptoribus illustrium dictorum Virorum contemporaneis suppeditatas, non convenire Cortici convoluto, sed exactissimè rubro ; & ultimò dum cernimus incolas *Novæ Hispaniæ* & etiam *Antiquæ* (si vera mihi a Viro nuper ex illa regione reduce relata sunt) Corticem rubrum pluris facere , rationi omnino consentaneum videbitur concludere Corticem rubrum revera hujus Medicamenti speciem esse, cujus efficaciam *SYDENHAMUS* & *MORTONUS* tantis laudibus extollebant , & quæ apud hos Viros eorumque contemporarios in communi usu erat.

Ut concludam, opusculum, quod meditaris, non solum tamquam reipublicæ utilissimum, quia optimi & efficacissimi Medicamenti famam stabilire & usum extendere intendit ; sed etiam tamquam maximè necessarium , ut præoccupatorum aut lucro ductorum hominum, qui meritiæ ejus famæ se opponunt & usum im-

pedire tentant, moliminibus resistat, omni commendatione dignum censeo. Subscribor &c.

J. MADDOCKS.

20. Septembris 1782.

D. KEIR Nosocomii DIVI THOMÆ Medicus me certlorem reddit circiter centum & quinquaginta libras Corticis rubri in eodem Nosocomio præscriptas fuisse &, ut judicat, feliciori cum eventu, quam a Cortice communi passim observari solet.

In ejus praxi non solum adversus intermittentes præscribebatur, sed etiam in Gangræna, Ulceribus Phagadaenicis, convalescentia post febres aliisque obviis morbis, in quibus Cortex communis alioquin datus fuisset, adhibitus fuit.

D. KEIR, ut respondeat ad objectionem a me allatam & refutatam, observat se, sub usu Corticis rubri in tot & tam variis morbis, ne vel casum vidisse, in quo nocivos effectus produxisse credi potuisset..



EXTRACTUM EX EPISTOLA

D. S H I R E F F

*Præclari Chirurgi & Pharmacopœ in
Deptford in Cantii Provincia.*

Postquam annotavit situm Vici *Deptford* & ejus viciniae Incolas febribus intermit- tentibus pertinacissimis maximè obnoxios red- dere, quarum etiam aliquas curatu difficilio- res expertus est, quam quas in parte occiden- tali *Sumatræ*, ubi symptomatibus gravioribus quam in Europa stipantur, vidit, ita prose- quitur " e multis ægris, quos sub cura habe-
,, bam, ut Corticis rubri vires tentarem, tres
,, sequentes casus elegi. Ut plures particula-
,, ritates præteream tantùm annotatum volo,
,, Corticem ordinarium singulari modo in om-
,, nibus defecisse. Quisque plures recidivas
,, passus fuerat; præsertim primi casus *Ægra*
,, spatio novem mensium, quibus in Provincia
,, *Lincolni* cum morbo conflictata fuerat, vix
,, habuerat inducias. Ut experiretur quid
,, aëris mutatio posset, huc venerat. Prius-
,, quam eam vidi jam inde tres menses hic
,, sine beneficio exegerat. „

Mulier generosa, infirmæ valetudinis; naturaliter tamen nervosi corporis habitus, præterito autumno in Provincia Lincolnii tertiana simplici corripiebatur, quæ a tempore trium mensium, quo huc advenerat, quartanam typum assumpserat. Cum a Cortice aliisque Remediis vix solamen habuisset opem medicam implorare cessaverat; sed maritus summa debilitate, qua paroxysmus stipabatur, perterrefactus me advocari jussit. Dictæ particularitates mihi relatæ sunt. Ictericum Ægræ habitum, crura tumida & alia summæ debilitatis symptomata inveni. Post aliquas difficultates ab ea impetravi, ut Medicamenta denuo assumeret. Illico ergo Corticis rubri plures doses, quarum singula tantum scrupulum continebat, ei misi; cumque quodvis oblatum fastidiret, suasi, ut sub universali sudore, dum fitis & dolor capitis minuerentur, eas tantum inchoaret & singulis quatuor vel sex horis repeteret. Hoc modo pro quatuor vel quinque diebus in hoc Medicamento perrexit. Tum, cum subsequens paroxysmus præcedentibus multò mitior esset, ab ea non potui im-

petrare, ut Corticem tam frequenter assumeret. Pro quatuordecim adhuc diebus tamen ejus usum continuavit, & quatuor scrupulos quotidie assumpsit, qui febrem omnino jugularunt. Optima jam fruitur valetudine.

C A S U S S E C U N D U S.

Nobilis Juvenis, naturaliter robustus & integræ valetudinis, plures duplicis tertianæ paroxismos, absque eo quod ullam medelam adhiberet, sustinuerat. Naturæ rem & curam potius committere statuerat, quam tantas & tot doses Corticis Peruviani assumere, quantas & quot aliquibus abhinc mensibus sine ullo constanti effectû assumpserat. Verùm cum delirium paroxismo superveniret, Consanguinei circa noctis medium me advocari jusserunt. Ægrum mentis compotem, profusis sudoribus diffluentem & stragulis obrutum inveni. Lecti vela accuratè clausa erant, & Aër externus accuratè e cubiculo exclusus. Remoto omni obstaculo, quod Aëris renovationi se opponebat, Ægri corpus panno sicco absterxi, & potui fervido, admixtis aromatibus incendiario, Aquam, in qua panis tostus infusus fuerat, Succo Citri acidulatam aliosque porus diluen-

tes actu frigidos substitui. Impetravi ut unicum adhuc Medicamentum tentaret. Illico ergo dragmam dimidiam Corticis rubri assumpsit, & omni quadrihorio repetiit. Ita primo ictu proximè secuturus paroxysmus fugatus est. Tribus tantum quotidie dosibus per tres adhuc dies assumptis, omnia Remedia seposuit. Nullam recidivam tamen passus est, & jam rectè valet.

C A S U S T E R T I U S.

Vir generosus, cum vespérâ humidæ tempestati se exposuisset, ordinariis febris symptomatibus correptus est. Illico Emeticum, postea alvum laxans ei propinatum est. De intermittente nihil suspicans iter Londinum instituit: statâ tamen periodo denuo febricitavit, &, quia imprudenter sub ipsa invasione domum regredi perrexit, gravissimum paroxysmum passus est. Dum sub febrilium symptomatum declinatione cutis madescebat, Corticis rubri dragmam dimidiam omni trihorio præscripsi. Paroxysmus posthac non rediit, & frequenter Coeli vicissitudinibus se exponens rectè tamen valere pergit. Suasi, ut bis de die parvam dosim hujus Remedii continuaret. Subscribor &c.

J. L. SHIREFF.

In Deptford 14. Septembris 1782.

A L T E R A E P I S T O L A

D. F O T H E R G I L L,

Medici Londinensis &c.

Amice Vir!

CUM Medici, laudabili studio, jam ab aliquo tempore Cortice Peruviano rubro occupati sint, & hujus rei exitus non parum profectò ad Reipublicæ commodum spectet, liceat mihi, obsecro, ultiores aliquas annotationes raptim exaratas, quæ post datas antè ad te Litteras mihi in mentem venerunt, judicio tuo submittere.


Allatum a te testimonium tot præclarorum Practicorum, qui, ut ejus defectus reticerent, aut vires exaggerarent, seducti esse nequeunt, ulteriora argumenta, quibus ejus præstantia probaretur, supervacua reddit: recentia alioquin aliqua successûs exempla in inveteratis intermittentibus, quæ Corticem ordinarium omnino eluserant, adferre potuissem. Quæcumque igitur dubia aut difficultates, circa ejus cum Cortice a MORTONO & SYDENHAMO adhibito identitatem, imposterum movebuntur, numquam facta, quibus ejus efficacia stabilita

biliter est, elidere poterunt. Circa initium hujus sæculi revera in usu fuisse tamen probabile videtur.

Cortex Peruvianus anno 1702. in capta Navi præfidiaria Hispanica inventus, cujus portiunculam D. PEARSON, ante quartuor annos adhuc præclarus hujus Urbis Pharmacopœus, acquisivit, ex omnibus circumstantiis videtur idem Medicamentum fuisse, de quo jam agitur. Quod verò magis attentionem nostram mereatur est, quod post spatium septuaginta & octo annorum fortiolem adhuc Decoctionem supeditet, & in febrium aliorumque morborum cura præstantiorem se præbeat, quam Cortex ordinarius: manifesto argumento hanc Corticis speciem vires medicas diutius retinere, quam existimari potuisset. In ulteriorem confirmationem singularis hujus proprietatis, & etiam ut probetur eum jam ante in hac regione in usu fuisse, sine mihi e Celeberrimo LISTERO locum notatu dignum, & aliquas characteristicas Corticis notas indicantem transcribere: ” Propria
 „ experientia testor, me ante viginti annos
 „ CORTICE TRUNCI sæpe usum esse ad CRASSI-
 „ TIEM ET LATITUDINEM VOLÆ MANUS, MAGNIS
 „ ET PROFUNDIS SULCIS ET FISSURIS CONSPI-

„ CUO , velut in VESTUTA ARBORE: imo eum-
 „ dem aliquando valdè cariosum putridumque
 „ ex necessitate , quod melior nullo pretio
 „ tunc temporis haberi potuit , & olim & nunc
 „ vix umquam frustravit eventu optimo &
 „ desiderato ; maximè si ejus modus & tempus
 „ exhibitionis ritè observantur. „ (*n*) Huic
 ulterius adde argumentum , quod mihi nuper
 D. SMITH , provectæ admodum ætatis prope
Andoverum Medicus , benignè impertiit. Af-
 ferit mihi Vir ille , quod obtento Corticis ru-
 bri specimine , ” ex odore , sapore & colore
 „ illico recognoverit , illum eundem esse , qui
 „ abhinc quinquaginta annis in communi usu
 „ erat. „ His recentia quædam exempla ejus
 successûs in febribus intermittentibus , quæ
 Cortici ordinario restiterant , subjungit.

Ab anno 1640., quo Cortex Peruvianus primò
 in Hispaniam allatus est, ejus fama continuò cre-
 dit , donec Incolæ *Loxæ* , deficientibus ve-
 tustis Arboribus non decorticatis, eum adjec-
 tis aliis Corticibus adulterarent ; quo detecto ,



(*n*) De hydrophobia pag. 56. Authori ; mihi in im-
 pressionem Amstelodamensi anni 1698. pag. 71. *Interpres.*


adeo infamatus est, ut anno 1690. multæ ejus cistæ in *Piuræ* repositoriis, quarum nulla divendi poterat, accumulatae essent. Ob hanc sophisticationem, & quia in dosibus nimis parvis, hinc inutilibus, adhibebatur, publicam expectationem tam frequenter fallebat, ut omnino rejiceretur: donec TALBOT Medicus Anglus, vir audax & ad omnia promptus, magis adæquatas genuini hujus Medicamenti doses exhibendo, ejus existimationem restitueret. Tam rapidè itaque tum ejus fama crevit, & quaquaversum sparsa est, ut Hispanis Mercatoribus tandem difficile fuerit, omnem, qui petebatur, latiore & ex adultis Arboribus desumptum Corticem emptoribus suis suppeditare: hinc partim necessitate, partim politica œconomia substituerunt Cortices tenuiores, quibus fora europæa jam diu repleverunt. Hinc explicari potest, cur Corticem convolutum, qui faciliùs præparatur & promptiùs in magna quantitate, idque sine Arborum exitio, obtinetur, extollere affectent. Celeb. DE LA CONDAMINE, qui *Loræ* abhinc quinquaginta annis aliquo tempore moratus est, asserit Corticem rubrum reliquis speciebus præstantiorem haberi, sed etiam tunc tem-

poris ob allatas rationes admodum rarum fore. (o)

Cortex Peruvianus ab aliquibus annis tanti momenti in Mercatura factus est, ut Mercatores nostri talem sibi procurare gaudeant qualem possunt; sed nullum ingenuum Medicum Hispanum, qui utramque speciem tentavit, utram præferret hæsitaturum suspicor.

Cum quantitas Corticis rubri hætenus allata minimè sufficiat, ut omnibus petitis satisfiat, non superest, nisi ut sedulò juniores practicos moneamus, ne ex institutorum experimentorum summa conclusiones minùs æquas præcipitantiùs deducant; sed donec, allato novo hujus Corticis supplemento, cum majori certitudine de respectivis viribus decernere possint, judicium differant.

Cum hætenus in intermittentium cura se efficaciorẽ & promptiorẽ Cortice ordinario promittat, majori etiam circumspẽctione Medicus uti debet, ut veram morbi indolem, & quo vergat, queat determinare: scilicet, an febris sit primaria, an secundaria tantum af-



fectio; an nullum obstaculum præviè auferri debeat; an nulla indicatio Corticis usum excludat, & demum utrum subita periodicorum illorum motuum suppressio periculosiores turbas producere nequeat.

E promiscuo, in morbis indole sua tam directè oppositis, Corticis Peruviani usu suspicari cogor inactivitatem universalis hujus Panaceæ, ab aliquo tempore tam deploratam, fausti potius ominis fuisse, & seriem malorum, quæ præposterum genuini Remedii usum excepissent, plerumque impedivisse.

In omnibus intermittentibus merè idiopathicis, epidemica constitutione oriundis, nullo alio morbo, vel interna inflammatione stipatis sine hæsitatione & audacter Cortex adhiberi potest, & in urgentissimis hujusmodi casibus, in quibus brevissima remissio observatur, quales in locis paludosis & regionibus calidioribus præciquè occurrunt, hoc Remedium nec nimis citò nec nimis larga manu adhiberi potest. Sub statu tam ancipiti tempus præcepti non admittit evacuationes præparatorias; hæcque præterea, si non nocivas, saltem plerumque inutiles esse tecum sentio.

Concedendum est e contrario intermittentes quandoque ab alio morbo peridēre , seu merè symptomáticas esse , & ab attento Practico potius tamquam Remedia , quam tamquam morbos debere considerari. Ut in podagra dolor , inflammatio & tumefactio articuli non est princeps morbus ; sed tantum effectus criticæ metastasis , morbi principis curam molientis ; ita in quibusdam casibus paroxysmi febriles salutaria naturæ conamina ad subigendam causam aliquam morbificam , vel pertinacem aliquem morbum magis exitialem superandum , debent haberi. In similibus casibus juvanda est natura ; non spolianda illis armis , quibus Paralyfes , Epilepsias aliosque morbos herculeos , quos tota Ars Medica alioquin non debellasset , quandoque vincit.

Hoc peracto paroxysmi febriles sponte cessant , vel tutò efficacissimo hoc febrifugo fugari possunt.

Non desunt ex alia parte exempla , in quibus superveniens febris priorem morbum non solum non tollit , sed etiam ejus symptomata multum exasperat , & , si sibi relinquatur , periculosos alios morbos producit. Diversos hos


casus accuratè & præcisè discernere in Medico scientiæ & judicii gradum requirit , qui in hodiernæ praxeos tumultuosa festinatione nimis rarò occurrit.

Quod ad generalem Corticis Peruviani operationem spectat , omnino approbo quæcumque de hac re satis abundeque adduxisti. Sequentes duntaxat animadversiones licentior subnectam.

Medici , dum febrium putridarum aliorumque obstinatorum morborum curam Cortice Peruviano aggrediuntur , maximè solliciti videntur , ut totam fluidorum massam specifica ejus virtute imbuant : verùm , utut hoc Remedium , nervosæ tunicæ canalis alimentarii applicatum , egregium se præstet , naturæ tamen intentio mihi nullatenus videtur , ut sanguinem subintret ; atque ideo , ne in interiores machinæ nostræ recessus admittatur , providè limites & obstacula posuit. Substantia , quæ repetitas Macerationes & Decoctiones in Aqua etiam per plures menses , absque eo quod omni sua amaritie & adstringentiâ orbetur , sustinere potest , non facilè in vasis sanguiferis subigenda foret ; sed verosimiliter , saltem in naturali statu ,


œconomiae animalis legibus penitus repugnaret. Circa hanc rem Celeberrimus FRIEND adfert, se non citius duas uncias Decoctio-
 nis hujus Remedii in canis venam jugularem infudisse, quam atroces sequerentur Palpitationes, Convulsiones, demum Mors. (*p*) Ita humanæ Fabricæ providus Conservator effrenatum superbientium mortalium Cursum sistit, dum per vanæ scientiæ nebulas, cæco gressu, devias semitas, quæ plerumque ad perniciosos errores ducunt, prosequuntur. Non quod naturæ leges & Medicamentorum effectus nimis studiosè investigare, vel nimio ardore prosequi possimus, tam diu quam, sedulæ observationis filum sequentes, nihil, nisi quod facile e phænomenis deduci potest, concludimus: verùm infeliciter e paucis, quæ de his rebus noscimus, plurima ad illam eamque majorem partem, quam ignoramus, spectantia supponimus, & hallucinationes hinc in theoria natæ transferuntur in praxim.

Tempore belli nuper in Germania gesti Gallorum Exercitum e Bohemia reducem species tertianæ putridæ invasit, quæ demum in criticos



ponè aures & sub axillis abscessus terminabatur. Hi abscessus ad plenam maturitatem ducti usitata in similibus casibus methodo aperiebantur. Sed non citius infauſta hæc operatio instituta fuerat, quam prægressa symptomata summâ virium prostratione stipata recurrerent, & Ægri paucorum dierum spatio interirent. Ægri rebus verò, absque eo quod aliquid ad promovendam vel retardandam suppurationem tentaretur, prudenti Naturæ consilio commissis, materia purulenta per canalem intestinalem, vel aliud quodvis emunctorium felicissimè evacuabatur. Ita Practici curationis methodum ab ipsa Natura designatam imitari discebant, & ab eo tempore ferè omnes hoc morbo correpti sanabantur. (q)

Ita plerumque Ars Naturæ imperium audacter occupat, & inordinatos complicatæ machinæ motus, modo sæpe improprio & insolito, moderatur. Ex hoc fonte in morborum cura innumeri errores, & tandem hallucinationes ad Medicamentorum effectus spectantes scatu-



(q) *Mémoires de l'Academ. Royale des Scienc. des Stockholm.*

riunt. Febres intermittentes & Cortex Peruvianus, quæ subiecta nunc investigamus, manifesta utriusque exempla præbent: nec ulla, in hac re expectanda est reformatio, nisi attentiores simus ad egrigium illud illustri VERULAMII præceptum: *non fingendum, aut excogitandum, sed inveniendum quid natura faciat, aut ferat.* Subscribor &c.

A. FOTHERGILL.

20. Septembris 1782.

Me arrogantiae non accusandum spero, si concludero, præcedentes observationes stabilendæ Corticis Peruviani rubri præstantiæ sufficere. Rationi consentaneum videtur sperari posse felicissimos effectus hujus Corticis introductionem concomitaruros, & nos eodem febres remittentes malignas, calidiorum regionum incolas & insalubrium loci conditionum effectus, Classibus nostris & Exercitibus tam exitiosas, promptius debellaturos.

Finem tamen his imponere nequeo, nisi præclaris Viris, qui de hac re commercium epistolare mecum intertinere non dedignati sunt, summas gratias persolvero. Oportere etiam ratus sum, ut iis, quorum litteræ seriùs mihi,

quam ut in hac publicatione locum habere possent, traditæ sunt, gratum animum exprimam.

Omnes in eo conveniunt, ut Corticem rubrum quavis alia specie efficaciorum judicent, & tamquam talem commendent.

E numerosis experimentis, quæ cum eodem in febribus intermittentibus aliisque morbis institui, mihi videor posse concludere, tantum dimidium illius quantitatis, ad quam Corticem ordinarium præscribimus, adhiberi debere.

Lætus quoque lectoribus assero, eundem in omnibus amplis hujus Metropolis Nosocomiis jam in communi usu esse, & ita alteri præferri, ut omnis, qui undique expetitur, difficulter suppeditari possit.


Ut ad notas characteristicas attendat, quibus a latioribus Corticis frustis, hætenus a Pharmacopolis nostris rejectis, distinguitur, unumquemque monitum volo.


In hujus subjeçti investigationibus sedulus esse pergam, & obnixè Amicorum meorum

benevolentiam imploro , ut accuratas observationes , quibus cum certitudine determinari possit , in quibusnam aliis morbis pretiosissimum hoc Remedium turò & efficaciter adhibendum sit , mihi impertire perseverent.

Remediorum agendi ratio & effectus non nisi unita industria & experientia sedulorum Virorum , qui difficultatis bonas observationes colligendi non ignari , adversùs inevitabilem hujus Artis fallaciam sufficienter sunt muniti , stabiliri possunt.

F I N I S.





1875

